

摘藻堂四庫全書薈要

集部

欽定四庫全書薈要卷一萬四千九百八十五

集部

施註蘇詩卷三十四

宋蘇軾撰

宋施元之註

武進邵長蘅刪補

詩五十七首

起在禮部洎元祐八年癸酉出知定州紹聖甲戌改元就任落職知英州

再貶惠州赴

嶺道中作

次韻錢穆父馬上寄蔣穎叔二首

玉關不用一丸泥自有長城烏鼠西剩與故人尋土物

臘糟紅麴寄駝蹠

後漢隗囂傳囂將王元曰請以一丸泥為大王東封函谷關唐李勣傳治并州十六年以威肅聞帝嘗曰煬帝不擇人守邊勞中國築長城以備鹵今我用勣守并突厥不敢南賢長城遠矣尚書西傾朱圉烏鼠孔安國云在隴西之西雍州之南山

多買黃封作洗泥使君來自隴山西高才得免人人羨  
爭欲尋蹤覓舊蹠

莊子外物篇筌者所以在魚得魚而忘筌蹠者所以在兔得兔而忘蹠

表弟程德孺生日

程德孺名之元事見二十四卷送德孺守楚州詩注德孺

元祐七年六月自嶺外持節歸以右朝奉郎  
為主客郎中進金部時與先生同朝先生還  
自海南又與德孺會  
金山始決計歸毗陵

仗下千官散紫庭微聞偶語說蘇程長身自昔傳甥舅

壽骨遙知是弟兄

公自注予與君皆壽骨貫耳班列中  
多指余二人不問而知其為中表也

曾活萬人寧望報

公自注君在楚州予在杭州  
皆遇饑歲活數萬人

祇求五畝

卻歸耕四朝遺老凋零盡鶴髮他年幾箇迎

七年九月自廣陵召還復館于浴室東堂八年

六月乞會稽將去汶公乞詩乃復用前韻三首

乞郡三章字半斜廟堂傳笑眼昏花上人問我遲留意

待賜頭綱八餅茶

公自注尚書學士得賜頭綱龍茶一斤今年綱到最遲

夢繞吳山卻月廊白梅盧橘覺猶香

公自注杭州梵天寺有月廊數百間

寺中多白楊梅盧橘會稽且作須臾意從此歸田策最良

東南此去幾時歸倦鳥孤飛豈有期斷送一生消底物  
三年光景六篇詩

吳子野將出家贈以扇山枕屏

峨峨扇中山絕壁信天剖誰知大圓鏡衡霍入戶牖得

之老月師畫者一醉叟常疑若人胸自有雲夢數千巖  
在掌握用捨彈指久低昂不自知恨寄兒女手短屏雖  
曲折高枕謝奔走出家非今日法水洗無垢浮遊雲釋  
嶠宴坐柳生肘忘懷紫翠閒相與到白首

楞嚴經六根圓通明照無二含十方界立大圓鏡後漢  
馬援傳何能臥牀上在兒女子手中耶韓退之詩釋嶠  
孤雲縱莊子至樂篇支離叔與滑介叔觀於冥伯  
之丘崑崙之虛黃帝之所休俄而柳生其左肘

東府雨中別子由

庭下梧桐樹三年三見汝前年適汝陰見汝鳴秋雨去

年秋雨時我自廣陵歸今年中山去白首歸無期客去  
莫歎息主人亦是客對牀定悠悠夜雨空蕭瑟起折梧  
桐枝贈汝千里行歸來知健否莫忘此時情

漢地理志中山國高帝郡景帝三年為國九域志定州  
定武軍有中山城對牀夜雨按辛丑歲東坡與子由別  
於鄭州詩云夜雨何時聽  
蕭瑟語意詳見卷一注下

謝運使仲適坐上送王敏仲北使

王敏仲名古  
文正公旦曾

孫

衝風振河朔飛霧失太行相逢不相識下馬須看黃洗

眼忽驚笑見此玉節郎喜有賢主人共惜此一作殘燭光

聚散一夢中人北鴈南翔吾生如寄耳送老天一方幸  
子遇明主陳經入西廂歸期不可緩倚相宜在傍

楚辭九歌衝風起兮水橫波唐地理志懷州河內縣有  
太行山杜子美贈衛八處士詩今夕復何夕共此燈燭  
光歐陽公詩白雲汾水上人北鴈南飛漢揚雄甘泉賦  
溶方皇於西清顏師古曰西清西廂清閑之處也廂作  
箱王文考靈光殿賦西廂踟躕以閒宴左傳昭十二年  
左史倚相趨過王曰是良史也子善視之是能讀三墳  
五典八索九丘

書丹元子所示李太白真



天人幾何同一漚謫仙非謫乃其游麾斥八極隘九州  
化為兩鳥鳴相酬一鳴一止三千秋開元有道為少留  
縻之不可矧肯求西望太白橫峨岷眼高四海空無人  
大兒汾陽中令君小兒天台坐忘身平生不識高將軍  
手污吾足乃敢瞋作詩一笑君應聞

莊子田子方夫至人者上闕青天下晉黃泉揮斥八極  
神氣不變曹子建七啟似若狹六合而隘九州韓退之  
雙鳥詩天公怪兩鳥各捉一處囚還當三千秋更起鳴  
相酬李白蜀道難歌西當太白有鳥道可以橫絕峨眉  
巔李白傳初遊并州見郭子儀奇之子儀嘗犯法白為  
救免及白坐永王璘當誅子儀請解官以贖子儀為中

書令汾陽王大鵬賦序昔於江陵口見天台司馬子微謂予有仙風道骨可與神遊八極之表子微坐忘論序敬尋經旨與心事相應者著坐忘安心之法略成七條以為修道階次李白傳嘗侍玄宗飲醉使高力士脫鞋力士素貴恥之摘其樂府以激揚妃帝欲官白妃輒沮止

次韻曾仲錫承議食蜜漬生荔支

曾仲錫溫陵人時為定武

倅

代北寒蠶擣韭葦奇苞零落似晨星逢鹽久已成枯腊

得蜜猶應

一作疑

是薄刑欲就左慈求拄杖便隨李白跨

滄溟攀條與立新名字兒女稱呼恐不經

公自注俗有十八娘荔枝

蔡君謨荔支譜紅鹽者以鹽梅浸佛桑花為紅漿投荔支漬之曝乾色紅而甘酸蜜煎者剝生荔支竿去其漿然後蜜煎煮之漢楊王孫傳鬱為粘腊神仙傳孫討逆怒左慈使行於馬前欲自後刺之慈著木屐拄竹杖徐行討逆鞭馬逐之終不能及再見

### 大行太皇太后高氏挽辭二首

至矣吾三后功高漢已還復推元祐冠蓋得永昭全

公自

注嘗於經筵論奏仁宗皇帝諡曰明孝若明而不仁則民畏而不愛仁而不明則民愛而不畏今大行太皇太后亦兼此二德故天下有作猶非聖無私乃是天侍臣思慕庶幾於仁宗也

談要道家法信家傳

公自注宰相以下嘗於經筵論奏祖宗以來家法十餘事書於記注

三后真宗后章憲明肅劉氏仁宗后慈聖光憲  
曹氏英宗后宣仁聖烈高氏皆嘗垂簾聽政

卻狄安諸夏先王社稷臣固應祠百世何止活千人定  
策天知我忘家帝念親萬方何以報得疾為勤民

社稷臣謂楚王高瓊景德契丹之役羣臣皆欲避狄獨  
萊公寇準不可武臣中惟瓊與萊公意同公既爭之力  
上曰卿文臣豈獨盡用兵之利害公曰請召高瓊既至  
乃言避狄為便公大驚以瓊為悔也既而徐言避狄固  
為安全但恐扈駕之士中路逃亡無與俱西南者耳上  
大驚始決北征之策宣仁后瓊曾孫也後漢和熹鄧皇  
后紀叔父陔言活千人者子孫有封凡訓為謁者使修  
石臼河歲活千人天道可信家必蒙福后訓女也漢霍  
光傳定萬世策以安社稷言太  
皇太后定立元祐天子之策

再和曾仲錫荔支

柳花著水萬浮萍荔實周天兩歲星

公自注柳至易成飛絮落水中經宿

即為浮萍荔支難長至二十四五年乃實

本自玉肌非鵠浴至今丹殼似猩

刑侍郎賦詠窮三峽妃子煙塵動四溟莫遣詩人說功

過且隨香草附騷經

莊子天運篇鷓不日浴而白烏不日黔而黑華陽國志永昌郡有猩猩其血可染朱蜀唐白樂天為忠州刺史有題郡中荔支詩重寄荔支與楊使君詩種荔支詩荔支樓對酒詩樂天入為刑部侍郎九域志忠州隸夔州路三峽山在夔州唐書楊貴妃嗜生荔支乃置騎傳送味未變已至京師杜牧過華清宮詩一騎紅塵妃子笑

無人知是荔支來楚辭離騷經序離騷之文依詩取興  
引類譬諭故善鳥香草以配忠貞惡禽臭物以比讒佞

次韻滕大夫三首

滕大夫名興公海陵人時為定武倅

雪浪石

太行西來萬馬屯勢與岱嶽爭雄尊飛狐上黨天下春  
半掩落日先黃昏削成山東二百郡氣壓代北三家村  
千峰石卷蠹牙帳崩崖鑿斷開土門竭來城下作飛石  
一礮驚落天驕魂承平百年烽燧冷此物僵臥枯榆根  
畫師爭摹雪浪勢天工不見雷斧痕離堆四面繞江水

坐無蜀士誰與論老翁兒戲作飛雨把酒坐看珠跳盆  
此身自幻孰非夢故國山水聊心存

唐文粹鄭亞會昌一品集序云上黨居天下之脊當河  
朔之喉史記張儀傳席卷常山之嶮必折天下之脊山  
經太華之山削成而四方王注古所謂山東乃今之河  
北晉地是也杜牧云山東王不得不得王霸不得不霸指  
今之河北謂之山東蓋太行山之東也山東二百郡正  
謂太行以東冀州之域矣杜子美河北入朝絕句澶漫  
山東一百州削成如按抱青丘國史補雷州多雷秋冬  
伏地中人取得雷斧雷墨可以為藥用漢溝洫志蜀守  
李冰鑿離堆避沫水之害穿三江成都中韓退之盆池  
詩老翁真箇似童兒汲井埋盆作小池白樂天三遊洞  
序水石相薄磷磷鑿鑿  
蹴球戲玉驚動耳目

同前

我頃三章乞越州欲尋萬壑看交流且憑造物開山骨

已見天吳出浪頭

公自注石中似有海獸形狀

履道鑿池雖可致玉

川卷地若為收洛陽泉石今誰主莫學癡人李與牛

山海經天吳水神也八首十尾唐白居易傳東都所居

履道里疏沼種樹構石樓香山鑿八節灘盧仝詩我縱

有神力爭敢將公歸揚州惡百姓疑我卷地皮賈氏諫

錄贊皇公平泉莊周回四十里天下奇花異草珍松怪

石靡不畢致今悉以絕矣怪石名品甚衆各為洛陽大

族有力者取去李衛公平泉花木記及詩序云後世以

一花一石移於他處者非李氏子孫德裕初封贊皇伯

後封衛國公唐牛僧孺傳治第洛之歸仁里多致嘉石



美木白樂天石記云公嗜石以甲乙丙丁為品第

沉香石

壁立孤峰倚硯長共疑沉水得頑蒼欲隨楚客紉蘭佩  
誰信吳兒是木腸山下曾逢化松石玉中還有辟邪香  
早知百和俱灰燼未信人言弱勝剛

唐本草注沉水香出天竺單于二國樹葉似橘經冬不  
凋本似檉柳重實黑色沉水者是吳兒木腸用賈充吳  
兒木人石心語出晉書夏統傳已見錄異記婺州永康  
山有枯松因斷墮水化為石枝幹及皮與松無異笠澤  
叢書東陽多名山金華永康之地中饒古松往往化而  
為石柱陽雜編自漢至唐公主下降乘七寶步輦四面

綴五色玉香囊囊中貯辟邪瑞麟香皆異國所獻也唐肅宗以香玉辟邪賜李輔國其香可聞數里老子柔之勝剛弱之勝彊

石芝 并引

予嘗夢食石芝作詩記之今乃真得石芝於海上子由和前詩見寄予頃在京師有鑿井得如小兒手以獻者臂指皆具膚理若生子聞之隱者此肉芝也與子由烹而食之追記其事復次前韻

土中一掌嬰兒新爪指良是肌骨勻見之怖走誰敢食

天錫我爾不及賓旌陽遠遊同一許長史玉斧皆門戶  
我家韋布三百年祇有陰功不知數跪陳八簋加六瑚  
化人視之真塊蘇肉芝烹熟石芝老笑唾熊掌嘖雕胡  
老蠶作蠶何時脫夢想至人空激烈古來大藥不可求  
真契當如磁石鐵

神仙感遇記蘭陵蕭靜之買地葺居掘得一物類人手  
肥且潤其色微紅烹而食之逾月齒髮再生偶遊鄴都  
見一道士指其脈曰子之所食者肉芝也神仙傳亦云  
周易包有魚義不及賓也洪州十二真君傳許遜字敬  
之弱冠拜旌陽令晉太康二年八月一日拔宅上昇東  
晉尚書郎邁護軍長史穆昏族子也真誥許邁清虛懷

道邀棲世外改名遠遊弟謚一名穆外雖泯俗務而內  
修真學穆生三男小男名翹字道翔小字玉斧禮記殷  
之六瑚周之八簋鄭氏云皆黍稷器毛詩於粲灑掃陳  
饋八簋化人堤蘇出列子詳見二十九卷與葉淳老詩  
注抱朴子芝有石芝木芝草芝肉芝菌芝名有百許種  
西京雜記菰之有米者長安謂之雕胡傳燈錄誌公善  
惡不二頌云聲聞執法坐禪如蠶吐絲自縛呂氏春秋  
慈石白鐵或引之也大涅槃經譬如磁石去鐵雖遠以  
其力故鐵則隨著衆生佛性亦復如是華嚴  
經如好磁石少分之力則能吸壞諸鐵鈎鎖

### 鶴歎

園中有鶴馴可呼我欲呼之立坐隅鶴有難色側睨予  
豈欲臆對如鵬乎我生如寄良畸孤三尺長脰閣瘦軀

俛啄少許便有餘何至以身為子娛驅之上堂立斯須  
投以餅餌視若無憂然長鳴乃下趨難進易退我不如  
漢賈誼服賦服乃太息舉首奮翼口不能言請對  
以臆禮記儒有難進而易退者粥粥若無能也

送曾仲錫通判如京師

邊城歲暮多風雪強壓春醪與君別玉帳夜談霜月苦  
鐵騎曉出冰河裂斷蓬飛葉卷黃沙祇有千林鬢鬆花  
應為王孫朝上國珠幢玉節與排衙左援公孝右孟博  
我居其間嘯且諾僕夫為我催歸來要與北海春水爭

先回

唐藝文志有五帳經年號記又咸通十一年以龐勣盜徐州停貢舉盧尚卿賦詩曰自從五帳論兵後不許金門諫獵來李華弔古戰場文月色苦兮霜白曾子固云齊地寒甚夜氣如霧凝於木上旦起視之如雪日出飄滿庭階齊人謂之霜松鬢鬆花疑即此白樂天懷微之詩今日排衙得免無後漢范滂字孟博岑暉字公孝嘯

諾注  
屢見

和錢穆父送別并求頓遞酒

聯鑣接武兩長身  
鶴鷺行中語笑親  
九子羨君門戶壯  
八州憐我往來頻  
佇聞東府開賓閣  
便乞西湖洗塞塵

更向青齊覓消息要知從事是何人

九子穆父之子九人東坡嘗戲之為九子母丈夫又東坡嘗歷密徐湖登杭潁揚及今定武凡八郡守

劉醜廝詩

劉生望都民病羸寄空窰有子曰醜廝十二行操瓢墻  
閒得餘粒雪中拾墮樵飢飽共生死水火同焚漂病翁  
恃一褐度此積雪宵哀哉二暴客掣去如飢鴟翁既死  
於寒客亦易此齟崎嶇走亭長不憚雪徑遙我仇祝與  
苑物色同遮邀行路為出涕二客竟就臬誆誆訴我庭

慷慨驚吾寮曰此可名寄追配柳之堯恨我非柳子擊  
節為爾謠官賜二萬錢無家可歸矯為媾他日婦婉然  
初垂髻洗沐作小史裹頭束其腰筆硯耕學苑弓一作戈  
矛戰天驕壯大隨爾好忠孝福可徵相國有折脇封侯  
或吹簫人事豈易料勿輕此僬僥

唐地理志定州望都縣莊子盜跖篇操瓢而乞者皆離  
名輕死不念本養壽命者也周易重門擊柝以待暴客  
柳子厚童區寄傳童童寄者柳州荒牧兒年十一歲二歲  
賊劫持反接布囊其口去虛所賣之寄偽兒唬恐慄為  
兒恒狀賊易之對飲酒一人去市一人臥植刃道上童  
以繩背刃力下上得絕因取刃殺之逃未及達市者還



將殺童童遽曰為兩郎僮孰若為一郎僮邪市者善之  
持童愈束縛牢甚夜半童以縛即爐火燒絕之復取刀  
殺市者因大號一虛皆驚吏白州州白大府刺史顏証  
奇之留為小史不肯與之衣裳護還之鄉史記范睢傳  
魏齊笞擊睢折脇摺齒睢佯死得出後遂相秦漢周勃  
傳常以吹簫給喪事後從高祖封絳侯列子湯問篇從  
中州以東四十萬里得  
焦僥國人長一尺五寸

題毛女真

霧鬢風鬟木葉衣山川良是昔人非祇應間過商顏老  
獨自吹簫月下歸

異聞集洞庭靈姻傳柳毅見龍女  
風鬟霧鬢商顏老高山四皓也

寄韶合刷餅與子由

此詩真迹臨川口挾嘗刻於婺倅聽事公自題其尾

云元祐八年十二月二十五日醉睡中作

老人心事日摧頽宿火通紅手自焙小甌短餅良具足  
穉兒嬌女共燔煨寄君東閣間烝栗知我空堂坐畫灰  
約束家僮好收拾故山梨棗待翁來

次韻子由清汶老龍珠丹

天公不解防癡龍玉函寶方出龍宮雷霆下索無處避  
逃入先生衣袂中先生不作金椎袖玩世徜徉隱屠酒

夜光明月空自投一鍛何勞緯蕭手黃門寡好心易足  
荆棘不生梨棗熟玄珠白璧兩無求無脛金丹來入腹  
區區分別笑樂天那知空門不是仙

劉慶忌幽明錄洛下一洞穴深不可測有人墮穴中良  
久方甦旁得一穴入見郭郭臺榭悉以金瑰為飾人皆  
長三丈因告哀求去長人引令過九處最後所至苦飢  
餒指中庭柏樹下一羊令跪將羊鬚初得一珠長人取  
之次將一珠亦取之後得一珠令噉甚得療飢因問九  
處名答曰還問張華可知其人復隨穴而出至交州七  
八年間方歸終南詣華問之華曰是崑崙下地仙九館  
羊名為癡龍初一珠食之與天地等壽第二珠食之可  
以延年第三珠充飢而已酉陽雜俎孫思邈常隱居終  
南山時大旱西域僧請於昆明池結壇祈雨凡七日縮

水數尺池龍化為老人至思邈石室請救孫謂曰我知  
昆明池有仙方三十首留傳與予予將救汝老人曰此  
方上帝不許妄傳今急矣固無所恡有頃捧方至孫曰  
爾第還無慮自是池水忽漲數日溢岸胡僧羞恚而死  
韓退之詩仙官敕六丁雷電下取將僧史僧聞禪師住  
邵武山中一日有老人謁聞曰我龍也以疲墮行雨不  
職上天有罰當死賴道力可脫俄失所在聞視坐榻傍  
有小蛇尺許延緣入袖中屈蟠暮夜風雷挾坐榻電激  
雨射山岳為搖而聞危坐不顧達旦晴霽垂袖蛇墮地  
而去史記魏信陵君傳侯生謂公子曰臣所過屠者朱  
亥此子賢者世莫能知故隱屠間耳又公子矯魏王令  
代晉鄙晉鄙疑之朱亥袖四十斤鐵椎椎殺晉鄙公子  
遂將晉鄙軍莊子列禦寇河上有家貧恃緯蕭而食者  
其子沒於淵得千金之珠其父謂其子曰取石來鍛之  
唐百官志門下侍郎龍朔二年改黃門侍郎按子由時  
為門下侍郎靈樞經扁鵲註曰化靈為姪女之胞十月

分胎狀如紫金上赤下黑左青右白其中中央黃號曰紫金丹白樂天詩吾學空門不學仙恐君此語是虛傳海山不是吾歸處歸則須歸兜率天互見七卷竹閣詩注

次韻子由書清汶老所傳秦湘二女圖

韓退之詩秦地

吹簫女相  
波鼓瑟妃

春風消冰失瑤玉我本無身安有觸羊生得婦如得風握手一笑未為辱先生室中無天遊佩環何處鳴風甌隨魔未必皆魔女但與分燈遣歸去胡為寫真傳世人更要維摩一轉語丹元茅茨祇三間太極老人時往還

點檢凡心早除拂方平神鞭常使物

真誥楊君自記論云紫微王夫人見降與一神女俱來  
曰此九華真妃也真妃曰聞君德音甚久不期今日得  
叙因緣歡願於冥運之會依然有絲蘿之纏矣夫人既  
去真妃小留而言曰冥情未攄意氣未忘明日當復來  
乃取棊手執之而自下牀未出戶之間忽然不見陶隱  
居注芻綠華詩云此是降羊權乃云楊君所書者當以  
其姓同音耳趙飛燕外傳帝於太液池作十人之舟后  
歌歸風送遠之曲帝以文犀簪擊玉甌倚后歌互見十  
一卷登常山絕頂詩注分燈用維摩經無盡燈事詳見  
前卷裴硯傳奇元和中元澈柳實艤舟合浦岸漂入大  
海抵孤島見玉虛尊師與南誥夫人會二子拜謁求返  
尊師曰子歸不難子宿分自有師夫人命侍女送二子  
馭百花橋而歸二子問吾師是誰云是南嶽太極先生  
既達昔維舟處回視無橋矣二子後共尋雲水偶雪中

見老叟負樵擔上有刻太極字遂禮為師隨詣祝融不復出云方平靴屐見史記封禪書李少君能使物卻老

紫團參寄王定國

谿訝土門口突兀太行頂  
豈惟團紫雲實自俯倒景  
剛風被草木真氣入苔穎  
舊聞人銜芝生此羊腸嶺  
纖纖虎豹鬣感縮龍蛇癭  
蠶頭試小嚼龜息變方騁  
矧予明真子已造浮玉境  
清宵月挂戶半夜珠落井  
灰心寧復然汗喘久已靜  
東坡猶故目北藥致遺秉  
欲持三椹根往侑九轉鼎  
為予置齒頰豈不賢酒茗

本草補注人參潞州太行山所出謂之紫團參文選注  
倒景氣去地四千里其景皆倒在下再見抱朴子鴟鵂  
展翅不動去地四千里風力猛壯所以可驗有剛風世  
界陸士衡文賦或苔發穎整離衆絕致本草人參一名  
人銜漢地理志上黨壺關縣有羊腸阪定命錄袁天綱  
與李崎同寢崎息自耳中起曰是龜息也龜息貴壽而  
不富王注珠落井以言嚙納也黃庭外景經抱珠懷玉  
和子室注云珠玉謂津液室謂身令人煉津液以和一  
身也周經本草相傳欲試人參者當使二人同走一與  
人參含之一不與度走三五里許其不含人參者必大  
喘含者氣息自如毛詩彼有遺秉本草高麗人作人參  
贊曰三極五葉背陽向陰欲來求我概樹相尋神仙傳  
仙方有九品其七  
名九轉霜雪之丹

次韻劉燾撫勾蜜漬荔支

劉燾字無  
言長興人



時新滿座聞名字別久何人記色香葉似楊梅  
蒸霧雨花如盧橘傲風霜每憐蓴菜下鹽豉肯與蒲萄壓酒漿  
回首驚塵卷飛雪詩情真合與君嘗

舊唐書白居易在南賓郡為荔枝圖寄朝中親友各記其狀曰荔枝若離本枝一日而色變二日而香變三日而味變四日外色香味盡去矣北夢瑣言薛能以文章自負累出戎鎮嘗鬱鬱歎惜因有詩謝淮南寄茶云癡官乞與真拋卻賴有詩情合得嘗

立春日小集戲

一作呈

李端叔

李端叔名之儀其先景城人後居當

塗舉進士力學善屬文為東坡所知元祐八年九月坡出帥中山辟掌機宜文字是時時

事將變端叔策知其然相與反覆論議先生  
是之曰自是相從之日益難得期與子游戲  
於文詞翰墨以寓其樂蜀人孫敏行子發亦  
辟在幕府而滕興公曾仲錫為倅五人相得  
甚懽明年五月先生遂謫嶺南端叔後歷樞  
密院編修官通判原州元符中監內香藥庫  
御史論為東坡客不可任京官詔停廢徽宗  
初提舉河東常平范忠宣公將薨以意授端  
叔作遺表未幾蔡京當國謂忠宣之子正平  
與端叔矯撰皆逮入御史府由是得辜貶廢  
終朝請大夫有姑溪前後集七  
十卷孫子發任止奉直大夫

白髮已十載青春無一堪不驚新歲換聊與故人談  
牛健民聲喜鴉嬌雪意酣霏微不到地和暖要宜蠶歲月

斜川似風流曲水慙行吟老燕代坐睡夢江潭丞掾頗  
哀援去聲歌呼誰怕參衰懷久灰槁習氣尚饒貪白啖本  
河朔紅消真劍南辛盤得青韭臘酒是黃柑歸臥燈殘  
帳醒聞葉打菴須煩李居士重說後三三

陶淵明有遊斜川詩序再見鄧道元水經注宋元嘉十  
一年以舊樂遊苑地為曲水武帝引流傳觴會者賦詩  
王注白啖荔枝名紅消黎名一本作熊白來河北豬紅  
削劍南按荔枝不應言河朔別本熊白為是延一廣清  
涼傳無著禪師遊五臺山問一僧云此處衆有幾何答  
曰前三三後三三又詳本卷贈清涼寺和長老詩注顧  
禧云此詩方叙燕遊而遽用後三三語讀者往往不知  
所謂蓋端叔在定武幙中持悅營妓董九者故用九數

以為戲爾聞其  
說於強行父云

次韻曾仲錫元日見寄

蕭索東風兩鬢華  
年年幡勝翦宮花  
愁聞塞曲吹蘆管

喜見春盤得蓼芽  
吾國舊供雲澤米

公自注定武齋  
酒用蘇州米君

家新致雪坑茶

公自注近  
得曾坑茶

燕南異事真堪紀  
三寸黃甘

擘永嘉

杜子美即事詩一雙白魚不受釣三寸  
黃甘猶自青按溫州永嘉郡歲貢黃甘

子由生日以檀香觀音像及新合印香銀篆槃

為壽一首

旃檀婆律海外芬  
西山老臍柏所薰  
香螺脫鱗來相羣  
能結縹緲風中雲  
一燈如螢起微焚  
何時度盡繆篆紋  
繚繞無窮合復分  
縣縣浮空散氤氳  
東坡持是壽卯君  
君少與我師皇墳  
旁資老冊釋迦文  
共厄中年點蠅蚊  
晚遇斯須何足云  
君方論道承華勛  
我亦旗鼓嚴中軍  
國恩未報敢不勤  
但願不為世所醺  
爾來白髮不可耘  
問君何時返鄉枌  
收拾散亡理放紛  
此心實與香俱煮  
聞思大士應已聞

南史西南蠻傳狼牙修國在南海中多棧沈婆律等香  
酉陽雜俎一木五香根旃檀節沉香花雞舌葉藿膠薰  
陸又龍脰香出婆利國有婆律樹高八九丈瘦者出龍  
脰香肥者出婆律香唐本草麝生益州形似麝常食柏  
葉水麝臍其香尤美又甲香海螺之壓也可聚香使不  
散雜衆香燒之使益芳獨燒則臭香譜蠶頭生雲南者  
取麝燒灰合香多用謂能發香復來香煙昔衛恒傳繆  
篆所以摹印也香譜香篆鏤木為篆文範以香塵卯君  
子由以巳卯生故云韓退之贈張祕書詩方今向太平  
元凱承華勛漢韓信傳建大將旗鼓按公自言帥定州  
也楞嚴經觀世音菩薩  
由聞思修入三摩地

次韻李端叔送保倅翟安常赴闕兼寄子由

中山保塞兩窮邊臥治雍容已百年顧我迂愚分竹使

與君談笑用蒲鞭松荒三徑思元亮草合平池憶惠連  
白髮歸心憑說與古來誰似兩疏賢

南史謝惠連傳族兄靈運嘗詩思竟日不就  
忽夢見惠連即得池塘生春草大以為工

中山松醪寄雄守王引進

鬱鬱蒼髯千歲姿肯來杯酒作兒嬉流芳不待龜巢葉  
公自注唐人以荷葉  
為酒盃謂之碧筒酒掃白聊煩鶴踏枝醉裏便成歌雪  
舞醒時與作嘯風辭馬軍走送非無意玉帳人間合有

詩

杜子美謝中丞乳酒詩鳴鞭走  
送旆漁父洗盞開嘗對馬軍

次韻李端叔謝送牛戩駕鴛竹石圖

聞君談西戎廢食忘早晚王師本不陳賊壘何足剗守  
邊在得士此語要而簡知君論將口似予識畫眼笑指  
塵壁間此是老牛戩平生師衛玠非意嘗理遣慙君定  
何人未用市朝顯置之勿復道世俗固多舛歸去亦何  
須單車度殺甬如虫得羽化已脫安用繭家書空萬軸  
涼曝困舒卷念當掃長物閉息默自煖此畫聊付君幽



處得小展新詩勿縱筆羣吠驚邑犬時來未可知妙斲  
待輪扁

穀梁傳善師者不陳善陳者不戰劉道醇聖宋名畫評  
道士牛哉字受禧河內人善畫花竹翎毛尤長破毛之  
禽泊寒雉野鵲每飲酒肆間或飲一斗然後畫片紙以  
質之至醒必購之遂毀畫而去柳子厚答韋中立書屈  
子賦曰邑犬羣吠吠所怪也僕往聞庸蜀之南常雨少  
日日出則犬吠僕來南二年冬幸大雪數州之犬皆蒼  
黃吠噬今韓愈既自以為蜀之日而吾子又欲使吾為  
越之雪不以病乎莊子天道篇輪扁斲輪於堂下得之  
於手應  
之於心

次韻聰上人見寄

聰事見本卷三絕  
句呈聞復詩注

前身本同社宿業獨臨邊一悟鏡空老始知圓澤賢歸  
心忘犢佩生術寄羊鞭不似歐陽子空留六一泉

異聞寶錄元和初齊君房遊錢塘有胡僧探囊出一棗  
大如拳曰食之者知過去未來事君房啖之頃刻乃悟  
前生講法華于同德寺是夕君房至靈隱寺翦髮具戒  
法名鏡空纂異記亦云圓澤與李源事屢見先生六一  
泉銘序歐陽文忠公將老自謂六一居士予昔通守錢  
塘見公於汝陰而南公曰西湖僧惠勤甚文而長於詩  
予到官三日見勤於孤山之下抵掌而論人物曰公天  
人也此邦之人以公不一來為恨公麾斥八極何所不  
至雖江山之勝莫適為主而奇麗秀絕之氣常為能文  
者用故吾謂西湖蓋公几案間一物耳明年公薨予哭  
於勤舍又十八年余為杭州則勤亦化去訪其舊居則  
弟子二仲在馬畫公與勤之像事之如生舍下舊無泉

予未至數月泉出講堂之後孤山之趾乃取勤舊語推本其意名之曰六一泉互見四卷臘日遊孤山詩注

次韻王雄州還朝留別

老李威名八十年壁間精悍見遺顏自聞出守風流似  
稍覺承平氣象還但遣詩人歌杖杜不妨侍女唱陽關  
內朝接武知何日白髮羞歸供奉班

王注老李指言李允則也先生作詩在元祐八年逆數八十年則真宗時也景德二年正月真宗以契丹初和易置守將白樞宰議可適用者首選公知雄州御筆置名於紙公在雄凡十四年事見李復圭所作李氏家傳

三月二十日多葉杏盛開

零露泣月藥溫風散晴葩春

一作天

工了不睡連夜開此

花芳心誰翦刻天質自清華惱客香有無弄妝影橫斜  
中山古戰國殺氣浮高牙叢臺餘袷服易水雄悲笳自  
從此花開玉肌洗塵沙坐令遊俠窟化作溫柔家我老  
念江海不飲空咨嗟明年花開時舉酒望三巴

公自注  
欲請梓

州而  
歸

漢鄒陽傳全趙之時武力鼎士袷服叢臺之下者一旦  
成市而不能止幽王之湛患顏師古曰叢臺趙王之臺  
也在邯鄲史記刺客傳燕太子丹送荆軻易水之上高  
漸離擊筑荆軻和而歌曰風蕭蕭兮易水寒壯士一去

今不復還皆垂涕而泣三巴記閬水東南流曲折三曲  
如巴字華陽國志武王克商封其子宗姬於巴至漢益  
州牧劉璋以墊口以上為巴郡以固  
陵為巴東永寧為巴西是為三巴

三月二十日開園三首

雪髯霜鬢語僮獐澹蕩園林取次行要識將軍不凡意

從來祇啜小人羹

公自注是日散父老酒食

左傳隱元年穎考叔曰小人有母皆嘗小人之食矣未嘗君之羹

西園牡籥夜沈沈尚有游人臥柳陰鶴睡覺時風露下

落花飛絮滿衣襟

漢五行志章城門牡自亡師古曰  
牡所以下閉者也亦以鐵為之

鬱鬱蒼髯真道友絲絲紅萼是鄉人

公自注蒼髯松何  
也紅萼海棠也

時翠竹江村路送我柴門月色新

杜子美南隣詩白沙翠竹  
江村暮相對柴門月色新

### 次韻王雄州送侍涇州

威聲又數中

去聲

興年二鹵行當一矢聯聞道名城得真

將故應驚羽落空弦追鋒歸去雄三衛授鉞重來定十

連別酒回頭便陳迹號呶端合發初筵

杜子美喜達行在所詩今朝漢社稷重數中興年漢周亞夫傳文帝曰此真將軍矣晉宣帝紀魏帝詔帝乘追鋒車晝夜兼行四百餘里一宿而至晉職官志文帝初置中衛將軍武帝分左右衛唐李密傳以蔭為左親衛大都督宇文述曰君世素貴當以才學顯何事三衛間哉淮南子凡命將主親授鉞曰從此上至天將軍制之禮記十國為連連有帥詩大雅賓之初筵溫溫其恭賓既醉止載號載嗽

臨城道中作

并引

予初赴中山連日風埃未嘗了了見太行也今將適嶺表頗以是為恨過臨城內丘天氣忽清徹西望太行草木可數岡巒北走崖谷秀傑忽悟歎曰

吾南遷其速返乎退之衡山之祥也書以付邁使  
志之

逐客何人著眼者太行千里送征鞍未應愚谷能留柳  
可獨衡山解識韓

韓退之謁衡嶽廟詩我來正逢秋雨節陰氣晦昧無清  
風潛心默禱若有應豈非正直能感通須臾靜掃衆峰  
出仰見突兀撐青空

過湯陰市得豌豆大麥粥示三兒子

朔野方赤地河壩但黃塵秋霖暗豆莢

一作漆

夏旱臞麥



人逆旅唱晨粥行庖得時珍青斑照七箸脆響鳴牙齧  
玉食謝故吏風食便逐臣漂零竟何適浩蕩寄此身爭  
勸加餐食實無負吏民何當萬里客歸及三年新

漢晁錯傳居太上廟堦中注云堦者內垣之外遊地也  
本草小麥人作麵第三磨者良為近麩也蓋麥之心曰  
人樂府古辭上有加餐食下有長相憶左傳成  
十年曰不食新矣杜預注言不得食新麥也

子由新修汝州龍興寺吳畫壁

韻語陽秋汝州  
龍興寺吳道子

畫兩壁一壁作維摩示疾文殊來問天女散  
花一壁作太子遊四門釋迦降魔筆法奇絕

子由曾  
施百練

丹青久衰工不藝人物尤難到今世每摹市井作公卿  
畫手懸知是徒隸吳生已與不傳死那復典刑留近歲  
人間幾處變西方畫

一作畫

作波濤翻海勢細觀手面分

轉側妙算毫釐得天契始知真放本精微不比狂花生  
客慧似聞遺墨留汝海古壁蝸涎可垂涕力捐金帛扶  
棟宇錯落浮雲卷新霽使君坐獻清夢餘幾疊衣紋數  
衿袂他年弔古知有人姓名聊記東坡弟

莊子天道篇古之人與其不可傳者死矣汝州為陸海軍

過高郵寄孫君孚

孫君孚名叔高郵人哲宗立為監察御史朝廷更法度遂

姦邪君孚多所建明擢中書舍人直學士院以集賢院學士知應天府紹聖初削職守房

歸二州賤

汀州卒

過淮風氣清一洗塵埃容水木漸幽茂菰蒲雜游龍可  
憐夜合花青枝散紅茸美人遊不歸一笑當誰供故園  
在何處已偃手種松我行忽失路歸夢千山重聞君有  
負郭二頃收橫從卷野畢秋獲殷牀聞夜春樂哉何所  
憂社酒粥面醲宦游豈不好毋令到千鍾

詩國風隰有游龍注云游龍紅草也史記蘇秦傳使我  
有雒陽負郭田二頃吾豈能佩六國相印乎詩國風橫  
從其畝杜子美詩梵放  
時出寺鍾殘仍殷牀

僕所至未嘗出遊過長蘆聞復禪師病甚不可

不一問既見則有間矣明日阻風復留見之作

三絕句呈聞復并請轉呈於參寥子各賦數首

聞復名思聰先生嘗有敘送其歸孤山曰錢  
塘僧思聰七歲善彈琴十二捨琴而學書書  
既工十五捨書而學詩詩有奇語老師宿儒  
皆敬愛之秦少游取楞嚴文殊語字之曰聞  
復

亦知壺子不死敢問老聃所遊瑟瑟寒松露骨耿耿病  
虎垂頭

莊子應帝王鄭有神巫曰季咸列子與之見壺子出而  
謂曰子之先生死矣弗活矣明日又與之見出而謂曰  
子之先生遇我也有瘳矣全然有生矣寓言篇陽子居  
南之沛老聃西遊於秦又孔子見老聃老聃方新沐曰  
吾游於  
物之初

莫言西蜀萬里且到南華一游扶病江邊送客杖屨浦  
口回頭

南華寺在韶州乃曹溪道場莊子漁父篇漁  
父杖屨逆立而夫子曲要磬折再拜而應

老去此生一訣興來明日重遊臥聞三老白事半夜南風打頭

古詩話川峽呼梢工篙手為三老故杜子美詩云長年三老應憐汝史記滑稽傳東郭先生拜謁曰願白事

六月七日泊金陵阻風得鍾山泉公書寄詩為

謝

今日江頭天色惡礮車雲起風欲作獨望鍾山喚寶公  
林間白塔如孤鶴寶公骨冷喚不聞卻有老泉來喚人  
電眸虎齒霹靂舌為予吹散千峰雲南行萬里亦何事

一酌曹溪知水味他年若畫蔣山圖仍為一作作泉公喚

居士

國史補暴風之候有礮車雲南史隱逸傳釋寶誌於宋  
太始中出入鍾山往來都邑預言未兆識他心智一日  
中分身易所遠近驚赴晉王戎傳眼爛爛如巖下電再  
見穆天子傳西王母如人虎齒善嘯韓退之遺瘡思詩  
詛師毒口牙舌作霹靂飛徐爰釋門略建康北十餘里  
舊名金山漢末秣陵尉蔣子文討賊戰亡靈發於山因  
立蔣侯祠故世號曰蔣山  
搜神幽明錄志怪書亦云

贈清涼寺和長老

代北初辭沒馬塵江南來見臥雲人問禪不契前三語

施佛空留丈六身老去山林徒夢想  
雨餘鐘鼓更清新  
會須一洗黃茅瘴未用深藏白氎巾

廣清涼傳大歷中釋無著至五臺山見一寺有童子出  
延無著問一僧此處衆有幾何答曰前三三後三三無  
著無對僧曰既不解速須引去童子送出門又問解否  
答曰不解童子曰金剛背後看師回首寺即隱無著愴  
然有偈云言下不知開佛印回頭只見舊山巖後漢西  
域傳明帝夢金人長大頂有光明以聞羣臣或曰西方  
有神名曰佛其形長丈六尺而黃金色房千里投荒記  
南方六七月芒茅黃枯時瘴大發土人呼為黃茅瘴

予前後守倅餘杭凡五年夏秋之間蒸熱不可  
過獨中和堂東南頰下瞰海門洞視萬里三伏



常蕭然也紹聖元年六月舟行赴嶺外熱甚忽  
憶此處而作是詩

忠孝王家千柱宮東坡作吏五年中中和堂上東南頰  
獨有人間萬里風

吳越王錢俶以太平興國三年舉族歸朝卒諡曰忠懿  
事具國史王注頰字內地常語宮室之房曰頰猶人之  
頤頰也杜子美夏夜歎安  
得萬里風飄飄吹我裳

慈湖夾阻風五首

捍索桅竿立嘯空篙師酣寢浪花中故應管蒯知心腹

弱纜能爭萬里風

此生歸路愈茫然，無數青山水拍天。  
猶有小船來賣餅，喜聞虛落在山前。

說文：虛，大丘也。古者九夫為井，四井為邑。四邑為丘。丘，謂之虛。或從土，廣雅：落居也。

我行都是退之詩，真有人家水半扉。  
千頃桑麻在船底，空餘石髮挂魚衣。

韓退之宿曹江口詩：雲昏水奔流，天水漭相圍。三江滅無口，其誰識涯圻。暮宿投民村，高處水半扉。爾雅：釋草，薄石衣，注水苔也。一名石髮。

日輪亭午汗珠融誰識南訛長養功暴雨過雲聊一快  
未妨明月卻當空

尚書平秩南訛孔安國曰訛化也  
掌夏之官平序南方化育之事

臥看落月橫千丈起喚清風得半帆且竝水村敲側過  
人間何處不巉巖

過廬山下

并引


予過廬山下雲物騰湧默有禱焉未午衆峰凜然  
故作是詩

亂雲欲羶山勢與飄風南羣嶺相應和勇往爭驂驪可  
憐奮蔚中時出紫翠嵐鴈沒失東嶺龍騰見西龕一時  
供坐笑百態變立談暴雨破塊坳清颺掃渾酣廓然歸  
何處陋矣安足戡亭亭紫霄峰窈窈白石菴五老數松  
雪雙溪落天潭雖云默禱應顧有移文慙

詩曰風奮兮蔚兮南山朝濟漢賈誼傳大鈞播物塊坳  
無垠注塊塵也北山曲也廬山記山南簡寂觀白雲峰  
其間一峰獨出而秀卓名曰紫霄峰又山南楞伽院舊  
名下白石證道院舊名上白石又栖賢寺東北有五老  
峰廬山之勝此為最焉默禱韓  
退之事移文孔稚圭事竝已見



施註蘇詩卷三十四



總校官庶吉士臣張能照

校對官編修臣楊壽楠

騰錄監生臣王泰雲

騰錄監生臣陶鐸

欽定四庫全書薈要

集部

施註蘇詩卷三十五至  
七

詳校官助教臣常循



欽定四庫全書薈要卷一萬四千九百八十六

集部

施註蘇詩卷三十五

宋蘇軾撰

宋施元之註

武進邵長蘅刪補

詩四十五首

起南遷盡在惠州  
作施注缺今補

壺中九華詩

并引一統志九華山在青陽縣  
舊名九子山李白謂九峯似蓮花

乃更  
今名

湖口人李正臣蓄異石九峯玲瓏宛轉若牕櫺然



予欲以百金買之與仇池石為偶方南遷未暇也  
名之曰壺中九華且以詩記之

清溪電轉失雲峯夢裏猶驚翠掃空五嶺莫愁千嶂外  
九華今在一壺中天池水落層層見玉女牕明處處通  
念我仇池太孤絕百金歸買碧玲瓏

裴氏廣州記大庾始安臨賀桂陽揭陽是謂五嶺壺中  
用費長房事詳第八卷刁景純席上詩注莊子逍遙遊  
南溟者天池也又按青城廬山皖山所在皆有天池  
詩持借言耳王文考魯靈光殿賦玉女闕牕而下視

江西一首

江西山水真吾邦白沙翠竹石底江舟行十里磨九龍  
篙聲犖确相舂撞醉臥欲醒聞淙淙真欲一口吸老龐  
何人得僂窺魚缸舉叉絕叫尺鯉雙

杜子美詩白沙翠竹江村暮柳宗元小石潭記下見小  
潭水尤清冽泉石以為底地志韶州昌樂縣有瀧水說  
文瀧奔水也韓退之詩山石犖确行逕微又詩船石相  
舂撞傳燈錄龐居士蘊參馬祖云不與萬法為侶者是  
什麼人祖云待汝一口吸盡西江水即向汝道左傳莊  
十一年得僂曰克韓退之又魚詩得僂語時囂爾雅石  
缸謂之碕古樂府客從  
遠方來贈我雙鯉魚

秧馬歌 并引

過廬陵見宣德郎致仕曾君安止出所作禾譜文  
既溫雅事亦詳實惜其有所缺不譜農器也予昔  
遊武昌見農夫皆騎秧馬以榆棗為腹欲其滑以  
楸桐為背欲其輕腹如小舟昂其首尾背如覆瓦  
以便兩髀雀躍於泥中繫束橐其首以縛秧日行  
千畦較之偃僂而作者勞佚相絕矣史記禹乘四  
載泥行乘橈解者曰橈形如箕擿行泥上豈秧馬  
之類乎作秧馬歌一首附于禾譜之末云

春雲濛濛雨淒淒春秧欲老翠剡齊嗟我婦子行水泥  
朝分一壠暮千畦腰如筵篲首啄雞筋煩骨殆聲酸嘶  
我有桐馬手自提頭尻軒昂腹脇低背如覆瓦去角圭  
以我兩足為四蹠聳踊滑汰入聲如鳧鷖纖纖束藁亦可  
齋何用繁纓與月題卻從畦東走畦西山城欲閉聞鼓  
聲忽作的盧躍檀溪歸來挂壁從高栖了無芻秣飢不  
啼少壯騎汝逮老鰲何曾蹶軼防顛隤一作擠錦鷲公子  
朝金閨笑我一生跼牛犁不知自有木馱馱

杜子美稻畦詩芊芊炯翠羽刺刺向銀漢瑩篔簹見首卷  
壬寅寄子由詩注按瑩篔簹似箏而腰曲故以為比韓退  
之詩磨淬出角圭古樂府解題有兩頭纖纖詩晉戴記  
童謠曰一束藁兩頭燃周禮王之五路一曰玉路錫繁  
纓註疏繫馬大帶纓馬鞍也月題字出莊子馬額上當  
顛如月形者的盧劉備事詳見十二卷和子由同遊百  
步洪詩注又水經注檀溪今有的盧溪尚書微子今爾  
無指告予顛隣江又通別賦金閨之諸彥注金馬門也  
杜子美詩李侯金閨彥駉字見漢書  
匈奴傳注俊馬也生七日而趨其母

八月七月初入贛過惶恐灘

七千里外二毛人十八灘頭一葉身山憶喜懽勞遠夢

公自注蜀道有錯喜地名惶恐泣孤臣長風送客添帆  
歡舖在大散關上

腹積雨浮

一作扶

舟減石鱗便合與官克水手此生何止

略知津

一統志贛州府城北章貢二水所合抵萬安縣界有十八灘惶恐其一也中多怪石最險

鬱孤臺

公自注以下四首皆虔州

八境見圖畫鬱孤如舊游山為翠浪湧水作玉虹流日

麗崆峒曉風酣章貢秋丹青未變葉鱗甲欲生洲嵐氣

昏城樹難聲入市樓煙雲侵嶺路草木半炎州故國千

峰外高臺十日留他年三宿處準擬繫歸舟

八景圖詩見十三卷一統志崆峒山在贛州郡城南後凡言崆峒者指此非隴州之崆峒也水經注劉登之曰

贛縣東南有章水西有貢水縣治二水之間因以名焉  
楚辭遠遊嘉南州之炎德韓退之詩南逾橫嶺入炎州  
或作洲三宿用內典語又浮屠不三宿桑下  
出後漢襄楷傳詳見二十卷別黃州詩注

### 廉泉

水性故自清不清或撓之君者此廉泉五色爛摩尼廉  
者謂我廉我以此名為有廉則有貪有慧則有癡誰為  
柳宗元孰是吳隱之漁父足豈潔許由耳何淄紛然立  
名字此水了不知毀譽有時盡不知無盡時竭來廉泉  
上捋鬚看鬚眉好在水中人到處相娛嬉

圓覺經譬如清淨摩尼寶珠映於五色隨方各現杜詩  
惟有摩尼珠可照濁水源再見愚溪貪泉洗耳並已見  
先生汎頴詩云豈此  
水薄相與我相娛嬉

### 塵外亭

楚山澹無塵顛水清可厲散策塵外遊麾手謝此世山  
高惜人力十步輒一憩卻立浮雲端俯視萬井麗幽人  
宴坐處龍虎為斬薙馬駒獨行疑豈墮山鬼計夜垣非  
助我謬敬欲其逝戲留一轉語千載起攘袂

幽人以下八句皆指馬祖事傳燈錄六祖謂南嶽曰向  
去佛法從汝邊去西天般若多羅識汝足下出一馬駒



踏殺天下人厥後江西傳法遂廣布於天下時號馬祖  
又馬祖始居此山山鬼為築垣自謂修行不至為鬼所  
識乃捨去又洞山直道本來  
無一物這裏合下得一轉語

天竺寺

并引

予年十二先君自虔州歸謂予言近城山中天竺  
寺有樂天親書詩云一山門作兩山門兩寺元從  
一寺分東澗水流西澗水南山雲起北山雲前臺  
花發後臺見上界鐘清下界聞遙想吾師行道處  
天香桂子落紛紛筆勢奇逸墨跡如新今四十七

年予來訪之則詩已亡有刻石存耳感涕不已而作是詩

香山居士留遺跡天竺禪師有故家空詠連珠吟疊壁已亡飛鳥失驚虵林深野桂寒無子雨浥山薑病有花四十七年真一夢天涯流落淚橫斜

唐宣宗弔樂天詩綴玉連珠三十年誰教冥路作詩仙按樂天此詩乃連珠體也書評懷素草書如飛鳥出林驚虵入草嶺表異錄山薑花莖葉即薑也根不堪食而葉間吐花細如麥粒按本草木一名山姜

### 過大庾嶺

一念夫垢汙身心洞清淨浩然天地間惟我獨也正今日嶺上行身世永相忘仙人拊我頂結髮受長生

莊子德克符受命於地惟松柏獨也正正在冬夏青青受命於天惟堯舜獨也正正在萬物之首白樂天詩可憐身與世從此兩相忘仙人二句乃李白流夜郎贈韋太守詩先生用其語盖有所感也

宿建封寺曉登盡善亭望韶石三首

圖經傳聞有二仙人

衣冠相對踞坐二石上云昔帝舜嘗奏樂于此言訖不見郡國志韶州有韶石山舜登此奏韶樂焉一統志在府城東北山多怪石

雙闕浮光照短亭至今猿鳥獻青熒君王自此西巡狩

再使魚龍舞洞庭

水經韶石對峙似闕又有鳳閣毬門之名劉夢得詩乘  
標不來廣樂絕獨與猿鳥愁青瑩西巡狩詩意以岳州  
洞庭在韶州西故云自此而西特借用舜典字耳莊子  
天運篇黃帝張咸池之樂於洞庭之野列子瓠巴鼓琴  
而鳥舞

蜀人文賦楚人辭堯在崇山舜九疑聖主若非真得道  
南來萬里亦何為

司馬相如大人賦歷唐堯於崇山兮過虞舜於九疑漢  
書汪崇山狄山也海外經曰狄山帝堯葬於其陽九疑  
山在零陵營道縣舜所葬也山海經南方蒼梧之丘其中  
有九疑山舜所葬處

嶺海東南月窟西功成天已錫玄圭此方定是神仙宅  
禹亦東來隱會稽

揚雄長楊賦西厭月窟東震日域尚書禹貢禹錫玄圭  
告厥成功孫綽天台賦玄聖之所降遊靈仙之所窟  
宅火記夏本紀禹東巡狩至于會稽而崩帝王世紀  
禹崩于會稽葬會稽山陰縣之南今山上有禹冢

月華寺

公自注寺鄰岑水場苑者皆  
坑戶也百年間蓋三焚矣

天公胡為不自憐結土融石為銅山萬人探斲富媪泣  
祇有金帛資豪姦脫身獻佛意可料一瓦坐待千金還  
月華三火豈天意至今茆舍依榛菅僧言此地本龍象

興廢反掌曾何艱高巖夜吐金碧氣曉得異石青爛斑  
坑流窟發錢湧地莫施百鎰朝千鍰此山出寶以自賊  
地脈已斷天應慳我願銅山化南畝爛熳黍麥蘇惇鯨  
道人修道要底物破鐺煮飯茹三間

漢書吳有章郡銅山又賜通蜀東道銅山鑄錢又禮樂  
志郊祀歌后土富媪昭明三光張晏注曰媪老母稱也  
坤為母故稱媪周禮大司馬仲夏教芟舍註草舍也智  
度論水行中龍陸行中象故荷大法力比之龍象按月  
華寺智藥三藏真身在馬故有龍象之語火記天官書  
金寶之上皆有氣杜子美詩潤聚金碧氣清無砂土痕  
漢書秦幣黃金方寸而重一斤以鎰為名尚書呂刑其  
罰千鍰史記蒙恬列傳蒙恬喟然太息曰起臨洮屬之

遼東城濼萬餘里此其中不能無絕地脈哉

### 南華寺

曹溪通志南華山南華寺為六祖慧能道場按通首皆六祖事

云何見祖師要識本來面亭亭塔中人問我何所見可  
憐明上座萬法了一電飲水既自知指月無復眩我本  
修行人三世積精鍊中間一念失受此百年譴摠衣禮  
真相感動淚雨霰借師錫端泉洗我綺語硯

傳燈錄道明禪師聞五祖密付衣鉢與盧行者即躡跡  
追逐至庾嶺曰我來求法願行者開示祖曰不思善不  
思惡正恁麼時那箇是明上座本來面目師當下大悟  
楞嚴經如人以手指月示人彼人因指當應看月若復

觀指以月為體此人豈惟亡夫月輪亦亡其指禮記樞  
衣趨隅必慎唯諾鮑昭詩泪下如流霞傳燈錄六祖初  
住曹溪卓錫泉湧清涼甘滑瞻足大衆曹溪志卓錫  
泉一名明通泉凡泉脈枯僧持祖衣往叩即通流

碧落洞

公自注在英  
州下十五里

槎牙亂峰合是蕩絕壁橫遙知紫翠間古來仙釋并陽  
崖射朝日高處連玉京陰谷叩白月夢中遊化城果然  
石門開中有銀河傾幽龕入窈窕別戶穿虛明泉流下  
珠琲乳湔交縵纓我行畏人知恐為仙者迎小語輒響  
苔空山自雷驚策杖歸去來治具煩方平



靈樞金景內經下離塵境上界玉京注云玉京無為之天也蓋三十二帝之都法華經有一導師以方便力化作一城於是衆人前入化城生已度想生安穩想一統志洞多懸石如霓旌羽蓋旁有小洞號雲華深不可測按詩所云幽龕別戶即指其處也史記魏其武安侯傳魏其夫妻治具自旦至今未敢嘗食神仙傳王方平降蔡經家須臾麻姑繼至再拜方平行厨具食皆金盤玉杯多諸花果芬香異常擘脯食之云是麟脯

### 峽山寺

公自注傳奇所記孫恪袁氏事即此寺至今有人見白猿者

天開清遠峽地轉凝碧灣我行無遲速攝衣步屣顏山僧本幽獨乞食況未還雲碓水自春松門風為關石泉解娛客琴筑鳴空山佳人劍翁孫遊戲暫人間忽憶嘯

雲侶賦詩留玉環林深不可見霧雨靈

一作埋

髻鬟

郭璞江賦豁然天開地志清遠峽一名中宿峽崇山峻

立中貫江流寺

一名飛來寺白樂天詩藥爐有火丹應

伏雲碓無人水自舂釋惠標詩松門夾細草又杜子美

詩松門似畫圖吳越春秋越王問劍於處女處女將見

王道逢袁公曰聞子善劍術女子曰願試也公即挽

以刺女女舉杖擊之

公即上樹化而為白猿傳奇廣德

中有孫恪者遊洛中過袁氏女遂納為室後十餘年同

至峽山寺袁氏欣然改服

鬢詣老僧乃持一碧玉環

獻僧曰此是院舊物僧初不曉及齋罷有野猿數十悲

嘯捫蘿而躍袁氏惻然俄命筆題詩云無端變化幾湮

沈剛被恩情役此心不如逐伴歸山去長嘯一聲煙霧

深詩畢遂裂衣化為老猿追嘯者躍樹而去老僧方悟

曰乃貧道為沙門時所養者碧

玉環則胡人所施繫於其頸者

舟行至清遠縣見顧秀才極談惠州風物之美  
到處聚觀香案更此邦宜著玉堂仙江雲漠漠桂花溼  
梅雨脩脩荔子然聞道黃柑常抵鵲不容朱橘更論錢  
恰從神武來弘景便向羅浮覓稚川

唐史若仗在紫宸內閣則起居舍人夾香案分立殿下  
杜子美詩朱橘不論錢晉書葛洪字稚川聞交趾出丹  
砂求為勾漏令刺史鄧嶽留  
不聽去洪乃止羅浮山屢見

### 廣州蒲澗寺

公自注地產菖蒲十二節相傳安  
期生之故居始皇訪之於此太平

寰宇記菖蒲澗一名甘溪南  
越志云交州刺史陸盾所開

不用山僧導我前自尋雲外出山泉  
千章古木臨無地  
百尺飛濤瀉漏天昔日菖蒲方士宅  
後來蒼葛祖師禪  
而今只有花含笑  
笑笑道秦皇欲學仙

公自注山中多含笑花

史記貨殖傳山居千章之楸注大材曰章又杜子美詩千章夏木清寔宇記戎州宜賓縣有大黎小黎二山四時霖霖俗謂之大漏天小漏天唐書地道漏天終歲雨杜子美詩鼓角漏天東香譜梔子香出大食國即佛書所謂蒼葛也傳燈錄仰山謂香高禪師曰汝只得如來禪未得祖師禪遊齋聞覽南方花木北地所無者大含笑小含笑其花常若菖葛之未敷者故有含笑之名

### 贈蒲澗長老

優鉢曇花豈有花問師此曲唱誰家已從子美得桃竹

公自注此山有桃竹可作杖而土人不識予始錄子美詩遺之不向安期覓棗瓜燕坐

林間時有虎高眠粥後不聞鴉勝遊自古兼支許為採

### 松肪寄一車

法華經佛告舍利佛如是妙法如優曇鉢花時一現耳  
王注佛言優曇鉢五百年而開花其花極香且有花而  
無實傳燈錄風穴延沼禪師有盧陂長老問曰師唱誰  
家曲宗風嗣阿誰延沼禪師曰超然迴出咸音外翹足  
徒勞躡底沙志林桃竹葉如棕身如竹密節而實中蓋  
天成拄杖也杜子美桃竹杖引江心蟠石生桃竹蒼波  
噴浸尺度足斬根削皮如紫玉江妃水仙惜不得云云  
晉書王羲之傳會稽有佳山水名士多居之孫綽李克

許詢支遁等皆以文義冠世並築室東土與義之同  
好本草松脂久服輕身不老一名松脂一名松肪

### 發廣州

朝市日已遠此身良自如三杯軟飽後

公自注浙人謂飲酒為軟飽

一枕黑甜餘

公自注俗睡為黑甜

謂蒲澗疎鐘外黃灣落木初天

涯未覺遠處處各樵漁

韓退之南海神廟碑扶骨之口  
黃木之灣按灣在府城東南

### 浴日亭

公自注在南海廟前

劍氣崢嶸夜插天瑞光明滅到黃灣坐看暘谷浮金暈

遙想錢塘涌雪山已覺滄涼蘇病骨更煩沆漉洗衰顏  
忽驚鳥動行人起飛上千峰紫翠間

列子孔子東遊見兩小兒辯鬪其一曰日出之初滄滄  
涼涼及其日中熱如探湯司馬相如大人賦呼吸沆漉  
分餐朝霞

### 游羅浮山示兒子過

人間有此白玉京羅浮見日雞一鳴

公自注劉夢得有詩記羅浮夜半見

日事山不甚高而南樓未必齊日觀鬱儀自欲朝朱明  
夜見日此可異也

公自注山有二石樓今延祥寺在南樓下東坡之師抱  
朱明洞在冲虛觀後云是蓬萊第七洞天

朴老真契久已交前生玉堂金馬久流落寸田尺宅今

誰耕道華亦嘗啖一棗

公自注唐永樂道士侯道華竊食鄧天師藥仙去永樂有無核

東人不可得道華獨得之

契虛正欲仇三彭

公自注唐僧契虛過

人導游稚川仙府真人問曰汝絕三彭之仇乎契虛不能答

鐵橋石柱連空橫

公自注山

有鐵橋石柱人罕至者

杖藜欲趁飛猱輕雲谿夜逢瘖虎伏

公自注山

有啞虎

斗壇畫出銅龍吟

公自注冲虛觀後有朱真人朝斗壇近於壇上獲銅龍六

一銅魚小兒少年有奇志中宵起坐存黃庭近者戲作凌

雲賦筆勢彷彿離騷經負書從我盍歸去羣仙正草新



宮銘汝應奴隸蔡少霞我亦季孟山玄卿

公自注唐有夢書新宮銘

者云紫陽真人山玄卿撰其略曰良常西麓原澤東泄

新宮宏宏崇軒轍轍又有蔡少霞者夢人遣書碑略曰

昔乘魚車今履瑞雲躅空仰塗綺輅輪還須略報老同

困其末題云五雲書閣吏蔡少霞書

叔贏糧萬里尋初平

公自注子由一字同叔

李太白詩天上白玉京十二樓五城劉禹錫羅浮山詩  
陰陽迭用事乃俾夜作晨伊嗑天雞鳴扶桑色昕昕赤  
波千萬里湧出黃金輪鄒師正羅浮指掌圖山高三千  
六百丈表直五百里周三百里上有大小石樓相去五  
里皆高出雲表登之可望滄海夜半見日初出泰山日  
觀注屢見黃庭內景經高奔日月吾上道鬱儀結鄰善  
相保注鬱儀奔日之仙也茅君內傳太天之內有地中  
之洞天三十六所羅浮山之洞周迴五百里名曰朱明

耀真之天謝靈運羅浮山賦朱明之陽宮耀真之陰室  
又山志云朱明洞即葛洪修煉之地黃庭內景經脾神  
常在字魂庭晝夜存之可長生注云竟黃庭也  
初平事見十四卷和子由送將官梁左藏詩注

十月二日初到惠州

按年譜為紹聖元年十月

彷彿曾遊豈夢中欣然雞犬識新豐吏民驚怪坐何事  
父老相攜迎此翁蘇武豈知還漠北管寧自欲老遼東

嶺南萬戶皆春色

公自注嶺南萬戶酒

會有幽人客寓公

西京雜記高祖既作新豐井移舊社衢巷棟宇物色惟  
舊男女老幼相攜路首各知其室放犬羊雞鴨於通衢  
亦競識其家三國志管寧北海朱虛人方天下大亂寧  
聞公孫度令行於海外遂與邴原王烈等至遼東即往

見度遂廬于山谷示無遷  
志禮記諸侯不臣寓公

卷三十五

### 寓居合江樓

海上蔥曠氣佳哉二江合處朱樓開蓬萊方丈應不遠  
肯為蘇子浮江來江風初涼睡正美樓上啼鴉呼我起  
我今身世兩相違西流白日東流水樓中老人日清新  
天上豈有癡仙人三山咫尺不歸去一杯付與羅浮春

公自注予家釀  
酒名羅浮春

二江東江西江也按府志東江自贛州南流過龍川河  
源至府城東西江在府城西南蓬萊方丈注屢見按廣

州香山縣有三洲山三山並立海中詩意似指此續仙傳侯道華好子史手不釋卷衆或問之要此何為答曰天上無愚

嘗仙人

白水山佛跡巖

公自注羅浮之東麓也在惠州東北二十里顧微廣州記南海

增城縣白水山有瀑布懸注百許文西有佛跡巖其東湯泉出焉志林紹聖元年十月十二日過遊白水佛跡院浴于湯池熱甚其源殆可熟物循山而東有懸水百仞八九折折處輒為潭水涯有巨人跡數十所謂佛跡也

何人守蓬萊夜半失左股浮山若鵬蹲忽展垂天羽根株互連絡崖嶠爭吞吐神工自爐鞴融液相綴補至今

餘隙罅流出千斛乳方其欲合時天匠麾月斧帝觴分  
餘瀝山骨醉后土峰巒尚開闔澗谷猶呼舞海風吹未  
凝古佛來布武當時汪罔氏投足不蓋拇青蓮雖不見  
千古落花雨雙溪匯九折萬馬騰一鼓奔雷賤玉雪潭  
洞開水府潛鱗有飢蛟掉尾取渴虎我來方醉後濯足  
聊戲侮回風卷飛電掠面過彊弩山靈莫惡劇微命安  
足賭此山吾欲老慎勿厭求取谿流變春酒與我相賓  
主當連青竹竿下灌黃精圃

地理志惠州浮山自會稽來今浮山上猶有東方草木  
又羅浮山記羅山自為一山浮山即蓬萊別島堯時洪  
水浮至依羅而止二山合體謂之羅浮按詩中蓬萊夫  
守及根株連絡神工綴補語即指此易明夷夷于左股  
莊子逍遙遊鵬之背若太山其翼若垂天之雲禮記堂  
下布武家語孔子曰汪罔氏之君守封嵎之山者為漆  
姓在虞夏商為汪罔氏於周為長翟氏按古佛三句指  
巨人跡也楞嚴經即時天雨百寶蓮花青黃赤白間錯  
紛糝柳子厚山水記泉大類轂雷鳴西奔李白襄陽歌  
此江若變作春酒壘麴便築糟丘臺杜子美泉眼詩何  
當宅下流餘潤通藥圃三  
春溼黃精一食生毛羽

詠湯泉

公自注在  
白水山

積水焚大槐蓄油災武庫驚然丞相井疑浣將軍布自

憐耳目隘未測陰陽故鬱攸火山烈甯沸湯泉注豈惟  
渴獸駭坐使癡兒怖安能長魚鼈僅可燂狐兔山中惟  
木客戶外時芒屨雖無傾城浴幸免亡國汚

莊子雜篇水中有火乃焚大槐博物志積油萬石則自  
然生火昔晉秦武中武庫火積油所致又臨邛火井諸  
葛丞相往視之後火轉盛異苑亦云聖證論梁冀衣布  
有垢則洗之於火後漢梁冀傳帝曰此跋扈將軍也列  
子周穆王大征西戎西戎獻火浣之布浣之必投于火  
布則火色垢則布色出火而振之皓然疑乎雪十洲記  
炎洲在南海中有火山山中有獸大如鼠毛長三四  
寸取其毛績以為布名曰火浣布左傳哀三年司鐸火  
子服景伯命濟濡帷幕鬱攸從之注鬱攸火氣也山海  
經注火山國雖經霖雨火常烈魏書崑崙之墟有炎火

之山詩小雅感沸檻泉吳越春秋越有木客村勾踐使  
工人伐木欲以獻吳久不得歸工人憂思作木客吟後  
人因以名其地互見十三卷八境圖詩  
註驪山華清宮有溫泉即貴妃浴處

### 自笑一首

子石如琢玉遠煙真削鬣入我病風手

公自注古語云磨墨如病風手

玄雲滄淒淒是中有何好而我喜欲迷  
既似蠟屐阮又如鍛柳嵇醉筆得天全  
宛宛天投蜺一作霓多謝中書君

伴我此幽栖

歐陽永叔硯譜端石以子石為上本草松柏千年為茯苓  
又千年為琥珀又千年為鬣燒之作松氣為用與琥



珀同狀似玄玉而甚輕出西戎釋名璧是眾珀之長亦  
曰璧其色黧黑故名阮屐嵇鍛並已見詩小雅有滄萋  
萋後漢五行志靈帝光和元年有黑氣墮北宮溫明殿  
東庭中黑如車蓋起奮訊身五色有頭體長十餘丈形  
貌似龍上問蔡邕對  
曰所謂天投蜺者也

朝雲詩

并引

世謂樂天有粥駱馬放楊柳枝詞嘉其主老病不  
忍去也然夢得有詩云春盡絮飛留不得隨風好  
去落誰家樂天亦云病與樂天相伴住春隨樊子  
一時歸則是樊素竟去也予家有數妾四五年相

繼辭去獨朝雲者隨予南遷因讀樂天集戲作此  
詩朝雲姓王氏錢塘人嘗有子曰幹兒未暮而夭  
云

不似楊枝別樂天恰如通德伴伶玄阿奴絡秀不同老  
天女維摩總解禪經卷藥鑪新活計舞衫歌扇舊因緣  
丹成逐我三山去不作巫陽雲雨仙

前三句故實屢見按阿奴句似指幹兒之夭也維摩經  
天女居維摩室與舍利佛發明禪理維摩曰此天女已  
能遊戲菩薩之神通也白樂天集有閒居貧活計詩宋  
玉高唐賦昔者先王嘗游高唐怠而晝寢夢一婦曰妾

巫山之神女也旦為朝雲暮  
為行雨朝朝暮暮陽臺之下

寄虎兒

按虎兒猶  
子遠也

獨倚枕榔樹間挑華撥根謀生看拙否送老此蠻村

廣志枕榔樹大四五圍長五六丈直上無條枝可作杖  
其顛生葉不過數十似柝欄本草圖經華撥生波斯國  
今嶺南有之多生竹林內  
正月發苗作叢高三四尺

十一月二十六日松風亭下梅花盛開

按年譜  
先生以

紹聖元年十月三日  
至惠州寓居嘉祐寺松風亭

春風嶺上淮南村昔年梅花曾斷魂

公自注予昔赴黃  
州春風嶺上見梅

花有兩絕句明年正月往岐亭道上賦詩  
云去年今日關山路細雨梅花正斷魂  
豈知流落復

相見蠻風蚤雨愁黃昏長條半落荔枝浦  
臥樹獨秀枕  
椰園豈惟幽光留夜色直恐冷艷排冬  
溫松風亭下荆  
棘裏兩株玉蘂明朝瞰海南仙雲嬌墮  
砌月下縞衣來  
扣門酒醒夢覺起繞樹妙意有在終無  
言先生獨飲勿  
歎息幸有落月窺清尊

一統志廣州府城東有荔枝洲周五十里南漢  
嘗建昌華苑其上按縞衣以下即咏趙師雄事

### 再用前韻

羅浮山下梅花村玉雪為骨冰為魂紛紛初疑月挂樹  
耿耿獨與參橫昏先生索居江海上悄如病鶴栖荒園  
天香國艷肯相顧知我酒熟詩清溫蓬萊宮中花鳥使  
綠衣倒挂扶桑暎公自注嶺南珍禽有倒挂子綠衣紅  
啄如鸚鵡而小自海東來非塵埃中

也抱叢窺我方醉臥故遣啄木先敲門麻姑過君急掃

灑烏能歌舞花能言酒醒人散山寂寂惟有落葉粘空  
樽

唐摭言僧栖白詩忍苦為詩身到此冰魂雪魄已難招  
杜子美徐卿二子歌秋水為神玉為骨又詩天橫醉後

參禮記子夏曰吾離羣而索居亦已久矣唐明皇天寶末遣使採民間美女納之宮中號花鳥使劉績霏雪錄桐花鳳即東坡詞所謂倒挂綠毛幺鳳是也李之儀詠倒挂詞自注云此鳥以十二月來好集美人釵上謂之收香倒挂又名探花使按此則花鳥使正指倒挂也異物志啄木大如鸛青黑色人呼為山啄木穿木食蠹左思詩南山有鳥自名啄木韓退之詩洛陽窮秋厭窮獨丁丁啄門疑啄木李肇國史補李泌以虛誕自任嘗對客曰令家人速掃麗今夜洪崖先生來有人遺美酒會有客至乃曰麻姑送酒來與君同傾言未畢門者曰某侍郎取榼子泌命倒還略無作色

### 新釀桂酒

先生桂酒頌序楚詞曰奠桂酒兮椒漿是桂可以為酒也有隱居者以桂

酒方教吾釀成而玉色  
香味超然非世間物也

搗香篩辣入瓶盆  
盎盎春溪帶雨渾  
收拾小山藏社壑  
招呼明月到芳樽  
酒材已遣門生致  
菜把仍叨地主恩  
爛煮葵羹斟桂醕  
風流可惜在蠻村

小山淮南小山作招隱士篇其詞曰桂樹叢生兮山之幽三見周禮酒正以式法授酒材杜子美詩清晨蒙菜把  
地主恩

惠守詹君見和復次韻

已破誰能惜甑盆  
頽然醉裏得全渾  
欲求公瑾一倉米  
試滿莊生五石樽  
三杯卯困忘家事  
萬戶春濃感國恩

刺史不須要半道籃輿未暇走山村

破甑孟敏事見第七卷與周長官游徑山詩注三國吳魯肅傳周瑜故過候肅并求資糧肅家有兩困米各三千斛肅乃指一倉與周瑜公瑾瑜字白樂天有卯飲詩籃輿半道用陶淵明事屢見

花落復次前韻

玉妃謫墮煙雨村先生作詩與招魂人間草木非我對  
奔月偶挂成幽昏暗一作香入戶尋短夢青子綴枝留

小園披衣連夜喚客飲雪膚滿地聊相溫松明照坐愁  
不睡井花入腹清而曠先生來年六十化道眼已入不



二門多情好事餘習氣惜花未忍都無言留連一物吾  
過矣笑領百罰空罍樽

玉妃借用太真事招魂楚辭篇名宋玉哀閔屈原無罪  
放逐恐其魂魄離散遂託帝命假巫語以招之杜子美  
詩兒童汲井花慣撓瓶在手本草井花水平旦第一汲  
者令人好顏色莊子蘧伯玉行年六十而六十化再見  
北史王晞傳謂盧思道曰卿輩亦是留連之一物豈直  
魚鳥而已杜子美詩數莖白髮那拋得百罰深杯亦不  
辭

江郊 井序

惠州歸善縣治之北數步抵江少西有盤石小潭

可以垂釣作江郊詩云

江郊蔥曠雲水蒼絢碕岸斗入洄潭輪轉先生悅之布  
席間燕初日下照潛鱗俯見意釣忘魚樂此竿綫優哉  
悠哉玩物之變

柳子厚記流沫成輪唐張志和傳自稱煙波釣徒志不  
在魚每垂釣不設餌韓退之詩舉竿引線忽有得詩小  
雅優哉  
悠哉

詹守攜酒見過用前韻作詩聊復和之

箕踞狂歌老瓦盆燎毛燔肉似羌渾傳呼草市來攜客

灑掃漁磯共置尊山下黃童爭看舞江干白骨已銜恩

公自注時詹孤雲落日西南望長羨歸鴉自識村

方議葬暴骨杜子美少年行莫笑田家老瓦盆又三絕句

縱恭略與羌渾同注謂吐谷渾西羌種也

寄鄧道士

并引

羅浮山有野人相傳葛稚川之隸也鄧道士守安  
山中有道者也嘗於菴前見其足跡長二尺許紹  
聖二年正月二日子偶讀韋蘇州寄全椒山中道  
士詩云今朝郡齋冷忽念山中客澗底束荆薪歸

來煮白石

抱朴子內篇云引石散以方寸七投一斗白石子中以水合煮之立熟如芋子

可食以當穀

遙持一樽酒遠慰風雨夕落葉滿空山何

處尋行迹乃以酒一壺依蘇州韻作詩寄之

一杯羅浮春遠餉採薇客遙知獨酌罷醉臥松下石幽人不可見清嘯聞月夕聊戲菴中人空飛本無迹

嵇叔夜養生論採薇山阿散髮  
岩岫柳子厚詩飛鳥無遺跡

上元夜

公自注  
惠州作

前年侍玉輦端門萬枝燈璧月挂果擘珠星綴觚稜去

年中山府老病亦宵興牙旗穿夜市鐵馬響春冰今年  
江海上雲房寄山僧亦復舉膏火松間見層層散策枕  
榔林林疎月鬢髻使君置酒罷蕭鼓轉松陵狂生來索  
酒公道自注賈一舉輒數升浩歌出門去我亦歸暮騰

端門宣德門也宋故事元夕皇帝登端門以宴羣臣柴  
愚觚稜竝已見中山府定州也南部新書云軍前大旗  
謂之牙旗又先生定州詩云鐵騎曉  
出冰河裂二句正指帥定武軍時事

正月二十四日與兒子過賴仙芝王原秀才僧  
曇穎行全道士何宗一同游羅浮道院及栖禪

精舍過作詩和其韻寄邁迨一首

栢禪寺在惠州豐湖上

斷橋隔勝踐脫屣欣小揭瘴花已繁紅官柳猶疎細斜  
川二三子悼歎吾年逝淒涼羅浮館風壁頽雨砌黃冠  
常苦饑迎客羞破袂仙山在何許歸鶴時墮毳崎嶇食  
松黃欲救齒髮弊坐令禪客笑一夢等千歲栖禪晚置  
酒蠻果粿蕉荔齋厨釜無羹野餉籃有蕙嬉游趁時節  
俯仰了此世猶當洗業障更作臨水袂寄書陽羨兒并  
語長頭弟門戶各努力先期畢租稅

詩國風淺則揭注攝衣涉水曰揭陶淵明游斜川詩序  
天氣澄和風物閑美與二三鄰曲同游斜川又云悲日  
月之遂往悼吾年之不留本草圖經松枝上黃粉名松  
黃應劭風俗通襖者潔也於水上盥潔之也王注陽羨  
兒邁也長頭弟迨也二子  
在常州迨長頭見先生詩

正月二十六日偶與數客野步嘉祐僧舍東南

野人家雜花盛開扣門求觀主人林氏媪出應

白髮青裙少寡獨居三十年矣感歎之餘作詩

記之一首

白鶴故居圖嘉祐  
寺在歸善縣西

縹蒂細枝出絳房綠陰青子送春忙涓涓泣露紫含笑

焰焰燒空紅佛桑落日孤煙知客恨短籬破屋為誰香  
主人白髮青裙袂子美詩中黃四娘

杜牧之詩醉折梨園縹帶花李商隱詩紅苞雜絳房釋  
名綠白色曰縹淺黃色曰緋大赤色曰絳余皇日疏佛  
桑出嶺南枝葉類江南檜樹花類中州芍藥而輕柔過  
之有深紅深紫淺紅數種剪插于土即活杜子美詩黃  
四娘家花  
滿蹊再見

龍尾石研寄猶子遠

皎皎穿雲月青青出水荷文章工點黠忠義老研磨偉  
節何須怒寬饒要少和吾衰此無用寄與小東坡

公自注遠



為人  
類予

晉書衛恒傳草書勢云或黠黠狀似連珠絕而不  
離後漢書賈彪字偉節兄弟三人並有高名而彪最優  
故天下稱曰賈氏三虎偉節最怒漢書蓋寬饒傳自以  
行清能高而為凡庸所越愈失意不快數上書諫諍太  
子庶子王生高寬饒不納竟被害  
此予書云云寬饒不納竟被害

### 贈王子直秀才

萬里雲山一破棗杖端閒挂百錢游五車書已留兒讀  
二頃田應為鶴謀水底笙歌蛙兩部山中奴婢橘千頭  
幅巾我欲相隨去海上何人識故侯

次韻表兄程正輔江行見桃花

曲士賦懷沙草木傷莽莽德人無荆棘坐失嶺嶠阻我  
兄瑚璉姿流落瘴江浦淨眼見桃花紛紛墮紅雨蕭然  
振衣袂笑問散花女我觀解語花粉色如黃土一言破  
干偈況爾初不語可憐一轉話他日如何舉故復此微  
吟聊和鷗鴉櫓江邊閒草木閒客當為主爾來子美瘦  
正坐作詩苦袖手焚筆研清篇直漫與願君一作理北  
轅六轡去如組上林桃花開水煖鴻北翥

史記屈平既紉乃作懷沙之賦其辭云滔滔孟夏兮草木莽莽傷懷永哀兮汨徂南土維摩詰經遠塵離垢得法眼淨李賀將進酒歌況是青春日將暮桃花亂落如紅雨振衣散花見十七卷李公擇過高郵詩注天寶遺事太液池千葉白蓮開帝與貴妃宴賞指妃謂左右曰何如此解語花也陳鴻長恨歌傳玄宗駕幸華清宮內外命婦媚耀景從上心油然若有顧遇左右前後粉色如土詔高力士潛搜外宮得楊玄琰女壽邸陸雲與兄機書云君苗能文每見兄文輒欲焚其筆研左傳宣十二年告令尹改乘轅而北之詩國風執轡如組

追餞正輔表兄至博羅賦詩為別

孤臣南游墮黃管君亦何事來牧蠻艤舟登戶龍岡窟  
置酒柳葉枕柳閒高談已笑衰語陋傑句尤覺清詩孱

博羅小縣僧舍古我不忍去君忘還君應回望秦與楚  
夢涉漢水愁秦關我亦坐念高安客神游黃蘗參洞山  
何時曠蕩洗瑕垢與君歸駕相追攀梨花寒食隔江路  
兩山遙對雙煙鬟歸耕不用一錢物惟要兩腳飛屩顏  
玉牀丹鏃記分我助我金鼎光爛斑

韓退之詩衙時龍戶集注即今蟄戶也謂採珠者一統  
志惠州有九龍岡在長樂吳都賦檳榔無柯柳葉無蔭  
南方草木狀椰樹葉如枘欄高五六丈無枝條高安縣  
隸筠州時子由分司南京筠州居住傳燈錄洪州黃蘗  
希運禪師筠州洞山良价禪師玉牀丹鏃見十八卷觀  
張師正所蓄辰砂詩注大丹祕契圖金鼎篇云金鼎者

上應天下應  
地中應人民

再用前韻

樂天雙鬢如霜管始知謝遣素與蠻我兄綠髮蔚如故  
已了夢幻齊人間蛾眉勸酒聊爾耳處仲太忍茂弘孱  
三杯徑醉便歸臥海上知復幾往還連娟六么趁蹋鞠  
香眇三疊滎陽關酒醒夢斷何所有落花流水空青山  
忽驚鏡鼓發半夜明月不許幽人攀贈行無物惟一語  
莫遣瘴霧侵雲鬟羅浮道人一傾蓋欲繫白日留君顏

應知我是香案吏他年許綴蓬萊班

晉書王敦字處仲王導字茂弘詩意用王愷使美人行  
酒事注已見踞鞠字出史記蘇秦傳又見衛霍傳今之  
蹴鞠也劉向別錄曰蹴鞠黃帝所造六么曲名琵琶錄  
唐崑崙彈新翻羽調綠香注綠香即錄要也本自樂工  
進曲上今錄出要者乃以為名後又訛為六  
么也陽關三疊詳見十二卷和孔密州詩注

施註蘇詩卷三十五

欽定四庫全書薈要卷一萬四千九百八十七

集部

施註蘇詩卷三十六

宋 蘇軾撰

宋 施元之註

武進邵長蘅刪補

詩四十八首

時在惠州作  
施註缺今補

真一酒

并引

米麥水三一而已此東坡先生真一酒也

撥雪披雲得乳泓蜜蠶又欲醉先生

公自注真一色味  
頗類予在黃州日



酒也

所醞蜜

稻垂麥仰陰陽足器潔泉新表裏清曉日著顏

紅有暈春風入髓散無聲人間真一東坡老與作青州

從事名

遊博羅香積寺

并引白鶴故居圖香積寺在惠州南博羅縣西山下

寺去縣七里三山犬牙夾道皆美田麥禾甚茂寺

下谿水可作碓磨若築塘百步閘而落之可轉兩

輪舉四杵也以屬縣令林抃使督成之

抃字天和

二年流落鼃魚鄉朝來喜見麥吐芒東風搖波舞淨綠

初日泣露酣嬌黃  
汪汪春泥已沒膝  
剡剡秋穀初分秧  
誰言萬里出無友  
見此二美喜欲狂  
三山屏擁僧舍小  
一谿雷轉松陰涼  
要令水力供臼磨  
與相地脈增堤防  
霏霏落雪看收麩  
隱隱疊鼓聞舂糠  
散流一吸雲子白

炊裂十字瓊肌香  
豈惟牢九薦古味

公自注東哲餅賦  
饅頭薄持起搜牢

九  
要使真一流  
天漿詩成捧腹便  
絕倒書生說食真膏

盲

國語范蠡謂王孫雄曰故濱於東海之波  
鼉鬣魚鼈之與處而鼉過之與同  
隋柳子厚詩麥芒際天搖青波文

選麥漸漸以擢芒謝靈運詩花上露猶泣白鶴故居圖  
三山者大北山象頭山白水山皆在水南一谿者即東  
江也在山之北柳州山水記泉大類轂雷鳴西奔漢武  
帝外傳太上之藥則有風寶雲子金精玉液杜子美詩  
飯抄雲子白晉書何曾性奢豪每燕見不食大官所設  
帝輒命取其食蒸餅上不拆作十字不食也真一酒名  
按東晉餅賦有饅頭薄壯起溲窄丸之名而先生詩用  
作窄丸又自注中薄壯作薄持起溲作起搜又三十八  
卷真一酒歌亦用起搜  
字想別有所據未詳

次韻定慧欽長老見寄八首

并引

蘇州定慧長老守欽使其徒卓契順來惠州問予  
安否且寄擬寒山十頌語有璨忍之通而詩無島

可之寒吾甚嘉之為和八首

吳郡圖經續記定慧禪院本萬歲子院在

長洲縣東祥符中改今額傳燈錄天台寒山子者本無氏族始豐縣西七十里有寒明二巖以其於寒巖中居止故名有頌三百餘首傳布人間又三祖僧璨鏡智禪師五祖弘忍大滿禪師賈島初為僧名無本可即僧可明也舊云郊寒島瘦

左角看破楚南柯聞長勝鉤簾歸乳燕穴紙出癡蠅為鼠常留飯憐蛾不點燈崎嶇真可笑我是小乘僧

左角用蠶觸事南柯用淳于棼事並見左傳隱十二年勝侯薛侯來朝爭長卒長勝侯傳燈錄古靈神贊禪師見蜂子投紙牕求出師曰世界如許廣濶不肯出鑽他故紙驢年去遂有偈曰空門不肯出投牕也太癡百年

鑽故紙未見出頭時韓退之詩癡如遇寒蠅李白書云  
白崎嶇厯落可笑人也傳燈錄圭峯云悟我空徧真之  
理而修者  
是小乘禪

鐵橋本無柱石樓豈有門舞空五色羽吠雲千歲根松  
花釀仙酒木客餽山殮我醉君且去陶云吾亦云

白鶴故居圖鐵橋峯在大石樓峰東大小二石樓在羅  
浮山下一統志五色雀出羅浮山貴人至則先翔舞先  
生在儋州有五色雀詩見三十八卷續神仙傳朱孺子  
一日忽見二花犬相趨入枸杞叢下因異之尋掘得二  
枸杞根形狀如犬白樂天詩不知靈藥根成狗怪得時  
聞吠夜聲原化記有老人雪中訪崔豈真獻松花酒老  
人云花澀無味乃取  
一丸藥投之味頓別

羅浮高萬仞不看扶桑早默坐朱明洞玉池自生肥從  
來性坦率醉語漏天機相逢莫相問我不記吾誰

白鶴故居圖朱明洞在麻姑峯  
之北又詳上卷遊羅浮山詩注

幽人白骨觀大士甘露滅根塵各清淨心境兩竒絕真  
源未純熟習氣餘陋劣譬如已放鷹中夜時掣紲

楞嚴經優婆尼沙陀白佛言觀不淨相生大厭離白骨  
微塵歸於空虛維摩經始在佛樹力降魔得甘露滅覺  
道成楞嚴經根塵同源縛脫無二又世間一切根塵陰  
處界等皆如來藏清淨本然張衡鶴鶴賦蒼鷹鷲而受  
紲

誰言窮巷士乃竊造化權所見皆我有安居受其全戲

作一篇書千古發爭端儒墨起

一作豈

相殺予初本無言

閒居蓄百毒救彼跛與盲依山作陶穴掩此暴骨橫區

區效一溉豈能濟含生力惡不已出時哉汝非爭

周禮醫師掌醫之政令聚毒藥以

供醫事注毒五毒也

疏藥之辛苦者又韓退之詩醫師加百毒詩大雅陶復

陶穴左傳宣十二年楚子曰今我使二國暴骨暴

矣禮記大道之行力惡其不出於身也不必為己

少壯欲及物老間餘此心微生山海間坐受瘴霧侵可

憐鄧道士攝衣問呻吟覆舟卻

一作吊

私渡斷槁費千金

按鄧道士名守安嘗造東  
新橋見下卷兩橋詩序

淨名毗耶中妙喜洹沙外初無往來相二土徒故切同一

在云何定慧師尚欠行腳債請判維摩憑一到東坡界

維摩經毘耶離城中有長者名維摩詰僧肇注云維摩  
詰秦言淨名也又佛言有國名妙喜佛號無動是維摩  
詰於彼國沒  
而來此生

二一作三 月十九日攜白酒鱸魚過簷使君食槐

葉冷淘杜子美槐葉冷淘詩青青高槐葉采掇付中厨新麩來近市汁滓宛相俱云云

枇杷已熟粲金珠桑落初嘗灑玉蛆暫借垂蓮十分盞



一澆空腹五車書青浮卵椀槐芽餅紅點冰盤藿葉魚  
醉飽高眠真事業此生有味在三餘

水經注劉白墮宿擅工釀採挹河流醞成芳耐懸食同  
枯枝之年排於桑落之辰故酒得其名霏雪錄河東桑  
落坊有井每至桑落時取水釀酒甚美庾信詩蒲城桑  
落酒灞岸菊花天王注槐芽餅取槐葉汁漉麩作餅即  
鮮碧色禮記少儀牛羊與魚之腥聶而切之為膾注云  
聶之言牒也先藿葉切之復報切之則成膾三國志注  
董遇言為學當以三餘冬者歲之餘夜者日之餘陰雨者時之餘也

江漲用過韻

草木生故墟牛羊滿空瀆春江圍草市夜浪浮竹屋已

連漲海白尚帶霍山綠坎離更休王魚鼈橫陵陸得非  
崑崙囚欲報陸渾衄行看北風競來救南國感長驅連  
山燒一掃含沙毒孤吟慙造化何時停倚伏當憐水旱  
氓不作舟車蓄江流儻席卷社酒期茅縮

房千里竹室記予環堵所棲率用竹以結其四周植者  
為柱榻撐者為椽桷破者為雷削者為障一統志霍山  
在龍川縣有三百七十二峯按東江過龍川入惠州界  
故云周易坎為水離為火漢書音義五行有王相死囚  
休廢即五行相勝之意也韓退之陸渾山火詩女丁婦  
壬傳世婚一朝結讐奈後昆又月及申酉利復怨助女  
五龍從九鯤溺厥邑囚之崑崙注水火相配今火勝水  
故結讐然水生於申火死於酉故帝於此時令之報怨

溺火官之邑而因火官於崑崙也按此正申上句坎離  
休王之意左傳襄十八年晉人聞有楚師師曠曰不害  
吾驟歌北風又歌南風南風不競又成十六年南國威  
射其元王中厥目山海經大荒南有蜮處水中舍沙射  
人影中則成瘡史記旱則資車水則資舟物之  
理也左傳僖四年爾貢包茅不入無以縮酒

連雨漲江二首

越井岡頭雲出山  
牂牁江上水如天  
牀牀避漏幽人屋  
浦浦移家蠶子船  
龍卷魚蝦并雨落  
人隨鷄犬上牆眠  
只應樓下平堦水  
長記先生過嶺年

史記西南夷傳牂牁江廣數里出番禺城下後漢南蠻  
傳楚遣將莊蹻伐夜郎軍至且蘭椽船於岸而步戰既

滅夜郎以且蘭有椽船牂牁處乃改其名為牂牁注繫  
船牁也亦作牂牁杜甫茅屋為秋風所破歌牀牀屋漏  
無乾處類書蠻人瀕海而居以舟  
為宅辨水色知龍居又曰龍人

急雨蕭蕭作晚涼卧聞榕葉響長廊微明燈火耿殘夢  
半濕簾帷浥舊香高浪隱牀吹甕盎聞風驚樹擺琳琅  
先生不出晴無用畱向空堦滴夜長

柰舍南方草木狀榕樹南海桂林多有之葉如木麻實  
如冬青枝條最繁其蔭十畝柳子厚詩山城過雨百花  
盡榕葉庭  
庭鶯亂啼

四月十一日初食荔支

南村諸楊北村盧

公自注謂楊梅盧橘也

白花青葉冬不枯垂黃

綴紫煙雨裏特與荔支為先驅海山仙人絳羅襦紅紗

中單白玉膚不須更待妃子笑風骨自是傾城姝不知

天公有意無遣此尤物生海隅雲山得伴松檜老霜雪

自困檀梨麤先生洗盞酌桂醕冰盤薦此頰虬珠似聞

江鱔斫玉柱更洗河豚烹腹腴

公自注予嘗謂荔支厚味高格兩絕果中無比

惟江鱔柱河豚魚近之耳

我生涉世本為口一官久已輕尊鱸人間

何者非夢幻南來萬里真良圖

臨海異物志揚梅其子大如彈丸正赤五月中熟司馬相如上林賦盧橘夏熟師古曰盧黑色也廣州記盧橘皮厚味酸大如柑至夏熟土人呼為盧橘張勃吳錄餘冬錄云相如作賦不知盧橘名杜杞按上林賦自有杜杞樵柿之文不應重出蔡君謨食荔枝詩絳衣仙子過中元別葉空枝去不還古今注中單襯衣也漢高祖始改名汗衫唐與服志凡祀天地之服皆白紗中單左傳昭二十八年叔向欲取于申公巫臣氏其母曰夫有尤物足以移人苟非德義則必有禍禮記棗棗鑽之莊子天運篇其猶粗梨橘柚耶其味相反而皆可于口韓退之柿詩然雲燒樹火實駢金鳥下啄頰此卵臨海異物志玉珖柱美如珖玉晉安南異物名記肉柱膚寸美如珖玉即江瑤也一云江瑤即海月藝苑雌黃河豚水族之奇味本草吳越人春月甚珍貴之尤重其豚腴呼為西施乳禮記少儀冬右腴疏曰腴腹下也杜子美設餚歌偏勸腹腴愧年少

桄榔杖寄張文潛一首時初聞黃魯直遷黔南  
范淳父遷九疑也

睡起風清酒在亡身隨殘夢兩茫茫江邊曳杖桄榔瘦  
林下尋苗蕈撥香獨步儻逢勾漏令遠來莫恨曲江張  
遙知魯國真男子獨憶平生盛孝章

唐書劉禹錫傳作問大鈞謫九年等賦又叙張九齡為  
宰相建言放臣不宜與善地悉徙五谿不毛處議者以  
為開元良善臣而卒無嗣豈伎心陰責竅大雖他美莫  
贖耶欲感諷權近而憾不釋張九齡傳韶州曲江人時  
呼為張曲江楊彪傳融謂曹操曰孔融魯國男子也會  
稽典錄盛憲字孝章有天下大名孫策欲誅之孔文舉

與曹公書意欲曹公致書救之書未至而已誅矣初憲為臺郎路逢童子容貌非常憲怪而問之曰魯國孔融憲異之乃載歸結為兄弟

### 答周循州

蔬飯藜牀破衲衣掃除習氣不吟詩前生自一作是盧

行者後學過呼韓退之未敢叩門求夜話時叨送米續

晨炊知君清俸難多輟且覓黃精與療飢

盧行者名慧能即曹溪六祖抱朴子內篇黃精一名救窮一名垂珠服花勝實服實勝根

### 與程正輔游碧落洞



空山不難到絕境未易名何時謫仙人來作釣天聲胸

中幾雲夢餘地多

一作方

恢宏長庚與北斗錯落綴冠纓

黃公獻紫芝赤松餽青精谿山久寂寞請續離騷經抱  
枝寒蛭咽繞耳飛蚊清謫仙撫掌笑笑此羽皇銘我頃  
嘗獨遊自適孤雲情君今又繼往霧雨愁青冥感君兄  
弟意尋羊問初平玉牀分箭簇不忍獨長生詩成輒寄  
我妙絕陶謝并孤鴻方避弋老驥猶在垆鳥獸如可羣  
永寄槁木形何山不堪隱飲水自修齡

曹子建與陳琳書披翠雲以為衣戴北斗以為冠高士傳四皓者角里先生綺里季夏黃公東園公也避秦逃入商洛山作歌曰莫莫高山深谷逶迤曄曄紫芝可以療飢真誥霍山有道者鄧伯原受青精石飯之法杜子美詩宜無青精飯使我顏色好按羽皇銘疑即用前卷自注山玄卿新宮銘事

六月十二日酒醒步月理髮而寢

羽蟲見月爭翾

一作翻

翻我亦散髮虛明軒千梳冷快肌

骨醒風露氣入霜蓬根起舞三人謾相屬停盃一問終無言曲肱薤簞有佳處夢覺瓊樓空斷魂

杜子美夏夜歎昊天出華月茂林延疎光仲夏苦夜短開軒納微涼虛明見纖毫羽蟲亦飛揚真誥大極緣經

云髮當數櫛血液不滯髮根常堅李太白詩青天有月  
來幾時我今停杯一問之白樂天寄李蘄州詩笛愁春  
盡梅花裏箏冷秋生薤葉中拾遺記翟乾祐與人觀月  
人問月中何所有乾祐曰隨我手看之月規半圓瓊樓  
玉宇滿焉良久乃隱又先生有詞云祇  
恐瓊樓玉宇高處不勝寒亦同此意

### 荔支歎

十里一置飛塵灰五里一候兵火催顛坑仆谷相枕藉  
知是荔支龍眼來飛車跨山鶻橫海風枝露葉如新採  
宮中美人一破顏驚塵濺血流千載永元荔支來交州  
天寶歲貢取之涪至今欲食林甫肉無人舉觴酌伯游

公自注漢永元中交州進荔支龍眼十里一置五里一  
候奔騰死亡懼猛獸毒蟲之害者無數唐羌字伯游為  
林武長上書言狀和帝罷之唐天寶  
中蓋取涪州荔支自子午谷路進入我願天公憐赤子

莫生尤物為瘡痍雨順風調百穀登民不飢寒為上瑞

集本無君不見武夷溪邊粟粒芽前丁後蔡相籠加自  
此二句

注大小龍茶始於丁晉公成於蔡君謨歐陽永叔聞  
君謨進小龍團驚歎曰君謨士人也何至作此事爭

新買寵各出意今年鬪品充官茶公自注今年閩中監  
司乞進鬪茶許之

吾君所乏豈此物致養口體何陋邪洛陽相君忠孝家

可憐亦進姚黃花公自注洛下貢  
花自錢惟演始

李太白詩誰能駕飛車相從觀海外金樓子奇肱之民  
能為飛車兵書海鵑頭低尾高前大後小如旗之狀木  
華海賦魚則橫海之鯨王注鵑橫海言船也按首四句  
指漢橫海四句指唐交州記龍眼樹高五六丈似荔支  
而小廣州記荔支大如桂樹實如雞子甘而多汁謝承  
季漢書唐羌上書云伏見交趾七郡獻生龍眼等鳥驚  
風發南州土地炎熱惡蟲猛獸不絕於路至於觸犯死  
亡之害死者不可生來者猶可救也此二物升殿未必  
延年益壽云云後漢書和帝紀元興元年帝以唐羌言  
下詔曰遠國珍羞本以薦奉宗廟苟有傷害豈愛民之  
本其敕大官勿復受獻按漢書曰元興先生詩云永元  
蓋末年改元即永元十七年也王注十五年誤張平子  
西京賦所惡成瘡痂武夷山在建州粟粒芽茶之極品  
者范希文詞年春日東南來建溪水暖冰微開  
溪邊奇花冠天下武夷仙人親手栽蘇軾歸朝謚忠懿  
先生有表忠觀碑互見前三十四卷忠孝王注歐陽壯

丹譜姚黃者千葉黃  
花出於民姚氏家

江月五首 并引

嶺南氣候不常吾嘗云菊花開時乃重陽涼天佳  
月即中秋不須以日月為斷也今歲九月殘暑方  
退既望之後月出愈遲然予嘗夜起登合江樓或  
與客游豐湖入栖禪寺扣羅浮道院登逍遙堂逮  
曉乃歸杜子美云四更山吐月殘夜水明樓此殆  
古今絕唱也因其句作五首仍以殘夜水明樓為

韻

一更山吐月玉塔卧微瀾正似西湖上湧金門外看冰  
輪橫海濶香霧入樓寒停鞭且莫上照我一杯殘

二更山吐月幽人方獨夜可憐人與月夜夜江樓下風  
枝夕一作久未停露草不可藉歸來掩關卧唧唧蟲夜話

三更山吐月栖鳥亦驚起起尋夢中遊清絕正如此驅  
雲掃衆宿俯仰迷空水幸可飲我牛不須違洗耳

四更山吐月皎皎為誰明幽人赴我約坐待玉繩橫野

橋多斷板山寺有微行  
今夕定何夕夢中遊化城

春秋元命苞玉衡北兩星為玉繩星謝眺詩玉繩低建章杜子美詩不違銀漢落亦伴玉繩橫

五更山吐月牕迴室幽幽  
玉鉤還掛戶江練卻明樓  
星河澹欲曉鼓角冷知秋  
不眠翻五詠清切變蠻謳

韓退之詩蟲鳴室幽幽月吐牕炯炯鮑昭月詩始出西南樓纖纖如玉鉤謝玄暉詩澄江淨如練

聞正輔表兄將至以詩迎之

生逢堯舜仁得作嶺南游  
雖懷楚然喜豈免跼墮憂  
莫雨侵重腿曉煙騰鬱攸  
朝槃見蜜啣夜枕聞鶉鷄  
幾欲



烹鬱屈固嘗饌鉤輈舌音漸獠變面汗嘗駢羞賴我存  
黃庭有時仍丹丘目聽不任耳踵息殆廢喉稍欣素月  
夜遂度黃茅秋我兄清廟器持節瘴海頭蕭然三家步  
橫此萬斛舟人言得漢吏天遣活楚囚惠然再過我樂  
哉十日留但恨參語賢忽潛九原幽萬里儻同歸兩鰥  
當對耄公自注軾喪婦已三年矣正強歌非真達何必

輔近亦有亡嫂之戚故云

### 師莊周

蹇然足音出莊子跼墮用後漢馬援事並已見左傳成  
六年韓獻子曰郇瑕氏之地其惡易覲易覲則民愁民

愁則塾隘于是乎有沈溺重脰之疾蜜啣即鼠胎飼之以蜜釘筵上獠民喜食之互詳下卷聞子由瘦詩注嶺表異錄鴉一名鴝鵒夜飛晝伏能拾人爪甲以為凶凶則鳴于屋上又名鬼車韓退之南食詩惟蛇舊所識實憚口眼獍開籠聽其去鬱屈尚不平又陸龜蒙苦熱詩蛇煩爭鬱屈蟹躁實郭索鉤輶鷓鴣聲也韓退之詩鷓鴣鉤輶猿叫歇李羣玉詩方穿詰曲崎嶇路又聽鉤輶格磔聲南越志鷓鴣肉白而脆味勝鷄雉韓退之南食詩腥臊始發越吞咀面汗驛楚辭遠遊仍羽人于丹丘兮雷不死之舊鄉列子老聃之弟子有亢倉子者得聃之道能以耳視而目聽莊子大宗師至人之息以踵衆人之息以喉再見唐書李珣傳為殿中侍御史宰相韋處厚曰清廟之器非擊搏才柳子厚鐵爐步志江之滸凡舟可縻而上下者曰步九國志王審知聞徐寅名辟居幕下寅不樂一旦拂衣去曰丈尺之水前波後堰焉能容萬斛之舟乎王注漢吏指正輔楚囚先生自謂也

漢書楊敞傳霍光遣田延年報敞以廢昌邑王事敞汗  
流洽背徒唯唯而已敞夫人遽從東廂與延年參語許  
諾注三人共  
言故云參語

再和

稚川真長生少從鄭公游孝章偶不死免為文舉憂餘  
齡會有適獨往豈相攸由來警露鶴不羨撮蚤鷗願加  
視後鞭同駕躅空輶寧滄墮齒堇勿憶齊眉羞何時遂  
縱壑歸路同首丘東岡松柏老西嶺橘柚秋著意尋彌  
明長頸高結喉無心逐定遠燕頰飛虎頭君方卒功名

一汎范蠡舟我亦霑霑渥漸解鍾儀囚寧須張子房萬  
戶自擇留猶勝嵇叔夜孤憤甘長幽南牕可寄傲北山  
早歸獲此語君勿疑老彭跨商周

晉書葛洪傳從祖玄吳時學道得仙以其煉丹祕術授  
弟子鄭隱洪就隱學悉得其法盛孝章注見本卷詩大  
雅為韓姑相攸箋云相視攸所也周處風土記白鶴性  
警至八月露降流於草木上滴滴有聲則鳴莊子秋水  
篇鴟鵂夜撮蚤察毫末晝出瞑目而不見丘山視後鞭  
亦用莊子語已見唐逸史蔡少霞夢為蒼龍溪王寫太  
皇真訣記得四句云昔乘魚車今履瑞雲躅空仰塗綺  
絡輪囷互見三十五卷公自注爾雅齧苦董也本草一  
種黃花者有毒殺人即毛芹也又烏頭苗一名董有毒  
唐書張果傳帝密語高力士朕聞飲董無苦真仙人也

因取以飲果三進頽然如醉顧曰非佳酒也頃視齒焦縮頽左右取鐵如意擊墮之更出藥傅其斷良久復生齊眉意指鰥居也禮記狐死正首丘言不忘本也漢書留侯世家高祖自擇齊二萬戶欲以封張良良曰始臣起下邳與上會留臣願封留足矣世本彭祖在商為守藏史在周為柱下史年八百歲又神仙傳彭祖壽八百

代  
歷三

同正輔表兄游白水山

白鶴故居岡白水山羅浮山之西瀑布在焉

偉哉造物真豪縱攫土搏沙為此弄擘開翠峽走雲雷  
截破奔流作潭洞因隨化人履巨迹得與仙兄躡飛鞚  
曳杖不知巖谷深穿雲但覺衣裘重坐看驚鳥救一作投

霜葉知有老蛟蟠石甕金沙玉礫粲可數古鏡寶奩寒  
不動念兄獨立與世踈絕境難到惟我共永辭角上兩  
蠻觸一洗胸中九雲夢浮來山高回望失武陵路絕無  
人送筠籃擷翠爪甲香素縵分碧銀餅凍歸路霏霏湯  
谷暗野堂活活神泉湧解衣浴此無垢人身輕可試雲  
間鳳

莊子大宗師偉哉夫造物將以予為此拘拘也再見按  
翠峽二句指瀑布化人句指佛迹也山有佛迹崖見前  
卷杜子美詩黃門飛鞚不動塵韓退之詩林柯有脫葉  
欲墮鳥驚救古詩淮南王篇金瓶素縵汲寒漿王褒湯

泉碑湯谷揚波神泉  
愈疾山有湯泉故云

與正輔遊香積寺

越山少松竹常苦野火厄此峰獨蒼然感荷佛祖力  
茯苓無人採千歲化琥珀幽光發中夜見者惟木客我豈  
無長鏡真贗苦難識靈苗與毒草疑似在毫髮把玩竟  
不食棄置長太息山僧類有道辛苦嘗谷汲我慙作機  
春鑿破混沌穴幽尋恐不繼書板記歲月

杜子美詩長鏡長鏡白木柄韓退之詩前計頓乖張居  
然見真贗漢書地理志號會之地土陘而險山居谷汲

王注傳曰杵白  
之智不及機春

次韻正輔同游白水山

祇知楚越為天涯不知肝膽非一家此身如綫自縈繞  
左旋右轉隨繅車誤拋山林入朝市平地咫尺千褒斜  
欲從稚川隱羅浮先與靈運開永嘉首參虞舜款韶石  
次謁六祖登南華仙山一見五色羽雪樹兩摘南枝花  
赤魚白蟹一作白魚赤蟹箸屢下黃柑綠橘籩常加糖霜不待  
蜀客寄荔支莫信閩人誇恣傾白蜜收五稜細斲黃土



栽三楹

公自注正輔分人參歸種韶陽來詩本用礪字惠州無書不見此字所出故且從木奉和

朱

明洞裏得靈草翩然放杖凌蒼霞豈無軒車駕熟鹿亦  
有鼓吹號寒蛙仙人勸酒不用勺石上自有樽壘窪徑  
從此路朝玉闕千里莫遣毫釐差故人日夜望我歸相  
迎欲到長風沙豈知乘槎天女側獨倚雲機看織紗世  
間誰似老兄弟篤愛不復相疵瑕相攜行到水窮處庶  
幾一見留子嗟十年枸杞嘗夜吠無數草棘工藏遮但  
令凡心一洗濯神人仙藥不我遐山中歸來萬想滅豈

復回顧雙雲一作鴉

飛

莊子德充符自其異者視之肝膽楚越也白樂天詩途窮平谷險舉足劇褒斜西鄙賦注褒斜谷在長安城西南南曰褒北曰斜長四百七十里謝靈運傳在永嘉登山臨水嘉處無不游嘗自始寧南山伐木開徑直入臨海周禮籩人掌肆籩之實加籩之實蒨芡栗脯物產志糖霜出遂寧宋時入貢荔支譜廣南及梓夔之間所出大率早熟其精好者僅比閩中之下品東觀漢記上賜朱祐白蜜一石蘇頌本草圖經雍洛間有梨花蜜白如凝脂嶺表錄瀛州山中多紫石英其大小皆五稜兩頭如箭鏃煮水飲之煖而無毒三桎見三十四卷寄紫團參詩注又互見本卷人參詩注李白長干行相迎不道遠直至長風沙同安志長風沙鎮在懷寧縣東一百二十里王維詩行到水窮處坐看雲起時雙雲鴉似指失偶事先生前詩有兩鰥之語玩洗凡心及萬想滅二語

可見雲鵝即所云雲鬢  
鵝鬢也作飛鵝解非

### 和子由次月中梳頭韻

子由詩序云轍有白髮  
近二十年矣然止百餘

莖不增不減度州道人王正彥教令拔去以  
真水火養之恐不復更生從其言已數月而  
白髮不出更年歲不見豈真不生耶子瞻兄  
示我月中梳頭詩戲次來韻言拔白之驗詩  
曰水上有車車自翻懸流如線垂前軒霜蓬  
已枯不再緣有客勸我拔其根枯根一去紫  
茸茁珍重已試幽人言紛紛華  
髮不足道當返六十過去魂

夏畦流膏白雨翻北窗幽人卧羲軒風輪曉長春笋節

露珠夜上秋禾根

公自注或為予言草木之長常在味  
明間早作而伺之乃見其拔起數寸

竹笋尤甚又夏秋之交稻方含秀黃昏月出露珠起于其根纍纍然忽自騰上若有推之者或入于莖心或垂于葉端稻乃秀實驗之信然此二事與子由養生之說契故以此為寄

從來白髮有公道

始信丹經非妄言此身法報本無二他年妙絕兼形魂

公自注傳燈錄有形神俱

妙者乃不復有解化之事

杜牧之詩公道世間惟白髮法報法身報身也字見華嚴合論

十一月九日夜夢與人論神仙道術因作一詩

八句既覺頗記其語錄呈子由弟後四句不甚

明了今足成之

折塵妙質本來空

公自注夢中於此句若了然有所得者

更積微陽一線

功照夜一燈長耿耿閉門千息自濛濛養成丹竈無煙

火點盡人間有暈銅寄語山神停伎倆不聞不見我何

窮

楞嚴經又鄰虛塵析入空者用幾色相合成虛空傳燈錄壽州道樹禪師得法於北宗秀在壽州三峰山結茅而居有一野人常化作佛及菩薩羅漢天仙等形或放神光或呈聲響如此涉十年後寂無形影師告衆曰野人作多色伎倆眩惑於人只消老僧不見不聞伊伎倆有窮吾不見不聞無盡

章質夫送酒六壺書至而酒不達戲作小詩問

之

白衣送酒舞

一作  
侮

淵明急掃風軒洗破觥豈意青州六

從事化為烏有一先生空煩左手持新蟹漫繞東籬嗅  
落英南海使君今北海定分百榼餉春耕

王注章特為廣帥孔融為北海  
相當有樽中酒不空語故云

小圃五詠

人參

上黨天下脊遼東真井底元泉傾海腴白露灑天醴靈

苗此孕毓肩肢一作股或具體移根到羅浮越水灌清泚

地殊風雨隔臭味終祖禰青極綴紫萼圓實墮紅米窮

年生意足黃土手自啟上藥無炮灸齧齧盡根抵開心

定魂魄憂恚何足洗糜身輔吾生一作軀既食首重稽

本草人參生上黨山谷及遼東釋名人參一名海腴春秋運斗樞瑤光星化而為人參故又名神草隋書五行志高祖時上黨人宅後每夜有人呼聲求之不得去宅一里所見人參枝葉異常掘之得人參一如人體四肢畢備本草圖經人參初生小者一極兩葉年深者生四極各五葉中心一莖有花細小如粟蕊如絲紫白色秋後結子如大豆青生熟紅白落藥性論人參主安精神定魂魄開心益智

地黄

地黄飼老馬可使光鑒人吾聞樂天語喻馬施之身我  
衰正伏櫪垂耳氣不振移栽附沃壤蕃茂爭新春沈水  
得穉根重湯養陳新投以東阿清和以北海醇崖蜜助  
甘冷山薑發芳辛融為寒食飴嚙作瑞露珍丹田自宿  
火渴肺還生津願餉內熱子一洗胸中塵

白樂天採地黄者詩凌晨荷鋤去薄暮不盈筐攜來朱  
家門賣與白面郎與君啖肥馬可使照地光願易馬殘  
粟救此苦飢腸本草地黄宜肥壤虛地則根大而多汁  
本草陶隱居云阿膠出東阿其用皮有老少則膠有清



濁又崖蜜生南方巖嶺間入藥最勝杜子美成州詩崖  
蜜亦易求釋名糖之清者為錫纂異記甘珍逢三書生  
曰我有瑞露珍釀百花中與飲甘香可愛  
天寶遺事楊貴妃含玉嚙津以解肺渴

枸杞

神藥不自閔羅生滿山澤日有牛羊憂歲有野火厄越  
俗不好事過眼等茨棘青黃春自長絳珠爛莫摘短籬  
護新植紫筍生卧節根莖與花實收拾無棄物大將玄  
吾鬢小則餉我客似聞朱明洞中有千歲質靈龙或夜  
吠可見不可索仙人倘許我借杖扶衰疾

詩小雅楚楚者茨言抽其棘本草枸杞冬採根春夏採  
葉秋採莖實又枸杞久服輕身不老一名仙人杖劉禹  
錫枸杞井詩枝繁本是仙人杖根老能成瑞  
犬形詩國風無使虬也吠又靈虬注見本卷

### 甘菊

越山春始寒霜菊晚愈好朝來出細粟稍覺芳歲老孤  
根蔭長松獨秀無衆草晨光雖照耀秋雨半摧倒先生  
卧不出黃葉紛可掃無人送酒壺空腹嚼珠寶香風入  
牙頰楚興發天藻新萸蔚已滿宿根寒不槁揚揚弄芳  
蝶生死何足道頗訝昌黎公一作翁恨爾生不早

先生記菊帖云嶺南地煖而菊獨後開考其理菊性介烈須霜降乃發而嶺海常以冬至微霜故也吾以十月望與客泛菊作重九書此為記唐太宗殘菊詩階蘭凝曙霜岸菊照晨光范至能譜序惟甘菊一種可食仍入藥餌楚些注已見神仙傳王母云神仙之書受而不敬是謂慢天藻韓退之秋懷詩鮮鮮霜中菊既晚何用好揚揚弄芳蝶爾生還不早

薏苡

伏波飯薏苡以禦瘴傳神良能除五谿毒不救讒言傷讒言風雨過瘴癘久亦亡兩俱不足治但愛草木長草木各有宜珍產駢南荒絳囊懸荔支雪粉剖桄榔不謂蓬

荻姿中有藥與糧春為芡珠圓炊作菰米香子美拾橡  
栗黃精誑空腸今吾獨何者玉粒照座光

鄴道元水經注武陵有五谿謂雄谿柎谿酉谿元谿辰  
谿謂之五谿蠻後漢馬援傳初援在交趾常餌薏苡以  
勝瘴氣軍還載之一車及卒後有譖之者以為前所載  
皆明珠文犀再見蔡君謨荔枝詩厚葉纖枝雜絳囊使  
君分寄驛人忙臨海異物志枕榔皮中有白粉似稻米  
及麥麵可作餅餌崔豹古今注芡一名鴈頭廣雅鷄頭  
謂之芡芡歐陽永叔食雞頭詩爭先園客採新苞剖蚌  
得珠從海底本草薏苡米白色如糯人呼為薏珠子春  
熟炊為飲食氣味如麥飯乃佳宋玉賦主人之女為臣  
炊彫胡之飯註彫胡菰米也廣雅菰蔣其米謂之彫胡  
杜子美寓居同谷縣詩歲拾橡栗隨狙公又  
黃精無苗山雪盛短衣數挽不掩脛再見

雨後行菜

夢回聞雨聲喜我菜甲長  
平明江路濕竝岸飛雨滌天  
公真富有乳膏瀉黃壤霜根一蕃滋  
風葉漸俯仰未任  
筐筥載已作杯盤  
一作想艱難生理窄一味敢專饗小  
摘飯山僧清安寄真賞  
芥藍如茵葦脆美牙頰響  
白菘類羔豚冒土出踏掌誰能視  
火候小竈當自養

詩國風于以盛之維筐及筥杜子美詩自鉏稀菜甲小  
摘為親情劉恂嶺南異物志南土芥高五六尺芥心嫩  
臺謂之芥藍陳仁玉菌譜芝菌最為上品葦凡九種味  
極香美海錄碎事江東人呼地茵為土茵陸佃埤雅菘

葉如燕菁性凌冬晚凋故曰菘俗謂之  
白菜左傳宣二年宰夫胹熊蹯不熟

### 殘臘獨出二首

幽尋本無事獨往意自長  
釣魚豐樂橋採杞逍遙堂  
羅浮春欲動雪日有清光  
處處野梅開家家臘酒香  
路逢眇道士疑是左元放  
我欲從之語恐復化為羊

杜子美詩江路野梅香  
神仙傳左慈字元放徐墮有道士  
術居丹徒慈過之墮門下客欺慈云  
徐公不在慈便去客報徐公有一老  
翁眇目吾欺之云公不在矣公曰  
咄咄此是左公過我化羊事屢見

江邊有微行詰曲背城市  
平湖春草合步到栖禪寺堂

空不見人老稚掩關睡所營在一食食已寧復事客來  
豈無得施子靜掃地風松獨不靜送我作鼓吹

詩國風遵彼微行陶淵明詩  
傾身營一飽少許便有餘

新年五首

紹聖三年先生年六十一在惠州即  
古白鶴基始營新居故有結茅來此

住之  
句

曉雨暗人日春愁連上元水生挑菜渚煙濕落梅村小  
市人歸盡孤舟鶴踏翻猶堪慰寂寞漁火亂黃昏

荆楚歲時記正月七日謂  
之人日以陰晴卜豐耗

北渚集羣鷺新年何所之盡歸喬木寺分占結巢枝生  
物會有役謀身各及時何當禁畢弋看引雪衣兒

江淹擬雜體詩問君亦何為百年會有役談苑李昉五  
禽呼鷺為雪客天寶遺事楊貴妃鸚鵡名雪衣娘詩借  
用其  
字耳

海國空自煖春山無限清冰谿結一作瘴雨雪茵到江

城更待輕雷發先催凍笋生豐湖有藤菜似可敵蓴羹

一統志豐湖在惠州府城西廣十里有漱玉灘點翠洲  
諸勝中產藤菜王注先生嘗言豐湖有燕脂藤味滑美  
大類

蓴



小邑浮橋外青山石岸東  
茶槍燒後有麥浪水前空  
萬戶不禁酒三年真識翁  
結茅來此住歲晚有無同

茶譜蘄州團黃茶  
有一槍兩旗之號

荔子幾時熟花頭今已繁  
探春先揀樹買夏欲論園  
居士常攜客參軍許叩門  
明年更有味懷抱帶諸孫

二月八日與黃燾僧曇穎過逍遙堂何道士宗  
一問疾

安心守玄牝閉眼覓黃庭  
問疾來三士澆愁有半餅  
風

松時落藥病鶴不梳翎樽空我歸去山月照君醒

次韻高要令劉湜峽山寺見寄

新聞妙無多舊學閒可束猶當隱李王未遽逃梅福空  
腸吐餘思靜似蠶綴族寸田結初果秀若銅生綠荆棘  
掃誠盡黎東憂不熟高人寧鑄金下士乃服玉君看嶺  
嶠隘我欲巾笥蓄曾攀羅浮頂亦到朱明谷旋觀真歷  
塊歸卧甘破屋故人老猶仕世味薄如穀偶從越女笑  
不怕蠻江浴驚聞尺書到喜有新詩辱應憐五管客曾

作八州督骨銷讒口鑠膽破獄吏酷隴雲不易寄江月

乃可掬遙知清遠寺不稱空明腹蹇驢步武碎短瑟絃

柱促仰看泉落珮俯聽石響轂千峰瀉清駛一往無回

躅狂雷失晤語過電不容目要知僧長飢正坐山少肉

人間無南北蝸角空出縮仇池九十九公自注仇池有九十九泉余嘗

夢至嵩少三十六公自注子由近買田天人同一夢仙

凡無兩錄陋邦真可老生理亦麤足便回熱天焰長作

照海燭公自注黃魯直寄詩云蓮花合裏一寸燭北馬海中燒百川魯直蓋近有得也

史記日者傳司馬季主楚人也卜于長安市本草生銅  
皆有青蓋銅之精華也抱朴子服玉當得璞玉以屑與  
水服之令人不死北史李預傳得餐玉之法乃採訪藍  
田掘得百枚作屑食之經年有效韓退之詩吾老世味  
薄又洪濤春天禹穴幽越女一笑三年留舊唐書永徽  
後以廣桂容邕安南皆隸廣府謂之五府節度使名嶺  
南五管又韓退之詩五管徧歷無賢侯王注引莊子謬  
晉書陶侃字士行嘗如廁見一人朱衣介憤斂袂曰君  
後當為公位至八州都督按先生有詩云八州憐我往  
來頻即紀實也史記鄒陽上梁王書衆口鑠金積毀銷  
骨南史王融矯詔立竟陵王子良太學生魏準鼓成其  
事及融誅準懼而死舉體皆青時以為膽破于良史詩  
掬水月在手韓退之詩雷驚電激語難聞傳燈錄司馬  
頭陀自湖南來百丈謂之曰老僧欲住為山可乎對曰  
為山奇絕可聚千五百衆然非和尚所住百丈云何謂  
也對云和尚是骨人彼是肉山設居之徒不盈于百矣

西京賦光焰燭天庭韓退之  
詩居然妄推讓見謂蕪天焰

施註蘇詩卷三十六